


NZAMBÌ ÛDÌMANYISHILA

KU NGIKÀDÌLÙ YÈNDÈ

 Mwwa mupapuke ndambu pa kumona mulunda wanyi, Joseph Boze, wawa, ki mêmè kukudimuka e kwangata ndambu wa dîbà bwa kumulabulaku ku cyanza.

2 Tubuululaayi mpindyewu mu Dîyì dya Nzambi, mu Ebelu, nshapita 1. Ndi muswe kubala, katupa, mvensa 1, mwi2, ne mwi3, bwa kupatulamu cyena-bwalu bwa diloolo edi.

Nzambi, yêyè uvwa mu bikondo bya kale ne mu mishindu mishiileshiilangane mu bikondo bishaale mwakwile ne baataatu kudi bapofeta,

Mu matuku a ndekeelu aa mmwakule neetu ku Mwanende, yêyè udiye muteeke mupyanyi wa bintu byônsò, ku yêyè kabidi kwakafukilaye buloba;

Yêyè udi mwikale mu dibàlakana dya butumbi bwende, ne cimfwanyi cya pyòpyopyò cya buupersona bwende, ne mwimanyike bintu byônsò ku dîyì dya bukole bwende, pavwaye. . . wàkasòmba ku dyabalume dya Mutambe bunene wa mu dyulu.

3 Twinyikaayi mitu yetu mpindyewu bwa disambila. Nenku mpindyewu mu Bwikadi Bwende bwa Bunzambi, pawikala ne dilomba nansha dya bishi dyùdì ujinga kumanyisha kudiYe, swaku wèlè anu cyanza muulu, ne cyôci aci ki dilomba dyebe, bwa Nzambi wamona mwa. . .

4 Taatù wetu wa mu Dyulu, nyewu tubànda mpindyewu kumpala kwa nkwaswa Webe wa butumbi, ku diitabuujà mu Dînà dya Yesu Kilsto, Mwan'Ebe. Ne tudi bapeebwe ditwishiibwa edi, ne: "Twètù balombe cintu kana cyônsò mu Dînà Dyende, necifidiibwe." Ne Wêwè udi mumanye majinga etu ne bitudi tukengela, ne Wêwè utu mulaye ne Neukumbaje byônsò bitudi tukengela. Pa nanku, Taatù, tudi tujinga kulomba mùdì Wêwè mutulongeshe ne: "Bukalenge Bwebe bulwe. Diswa Dyebe dyenzeke pa buloba, bu mudidi dyenzeka mu Dyulu." Bwa dilomba dyetu, diloolo edi, dyamona mwa kwikala bilondeshile Dyebe dijinga dya kucifila, ne kutupa dyèsè edi. Laabaaku Dîyì, Mukalenge, ne baakudi ne bateeleji bônsò, ne swaku bwa Nyuma Mwîmpè abwele ne ikale mwenji wa Dîyì, diloolo edi, munkaci mwetu. Bwalu tudi tulomba nunku mu Dînà Dyende Yêyè. Amen.

Nudi mwa kusòmbaayi.

5 Maalaba mu dinda, ndi muumvwe ne, kudi didya dya Beena Kantu-ku-byanza baa Evanjeeliyo mu Kaabujima. Pa ciibidilu, mwaba utubo ne dyâpà kampana, mêmè ntu ne dyèsè dya kwakula ku didya dyabo adi. Too ne ku dîbà ditudi edi, cyôci aci ki bulongolodi bumwepele, kî mbulongolodi to, kadi, kasumbu kamwepele kândiku mêmè—mêmè mwikalemu, m'Beena Kilisto baa Kantu-ku-byanza abu. Nenku mpindyewu mêmè ntu anu nyiisha bwabo bôbò, mu buloba bujima.

6 Mpindyewu, diloolo edi, tudi batwishiibwe ne cikongo eci kaeyakwenjiibwa anu cyanaana to. Ndi mulwe kunudi, mucyoke, ne muminu mununsuke wônsò, ne mwikale mupete disansakana dikese dya . . .

7 Ndi mufumine ku Tucson kudi kuulu kwîmpè menemene ne kûme, ne ndi mulwe muneemu mudi kuulu kwîmpè menemene ne kwikale citaleela, pa nanku kudi dipanganangana anu dyetu dya bushuwa edi. Nwênù bàdì ne mâyi ônsò muneemu aba, bu nwênù anu mwa kuàtuma kutudi kwaka, s'tudi bafwanyine kucyanyisha. Kadi kanwena mwa kwenza aci to, mu bushuwa bwa bwalu.

8 Kadi ndi nzwambila cintu cimwepele ne, kudi lusumwinu mwaba awu. Byetu—byetu—byetu bintu byônsò bya mu Arizona mwamwa, yetu mici, mbyûle tente ne mêmè. Cintu cyônsò cidi anu ne dyêbà. Mbwalu ncyûme. Mpindyewu bu cisoosa cimwecimwe aci mwa kutoloka muneemu emu, ncifwanyine kwikala dibeji dilenga dya dikema. Nwamonu's, ncipange mâyi, ki bwa cinyi cidi cishaala dyêbà.

9 Nenku padi ekeleziya, yêyè pende, ushaala kacyi ne Mâyì a Mwoyi to, udi ushaala mûme ne utwangana bu dyêbà, utwangana ne utubula bintu byônsò. Kadi mwaba ùdì mâyi a Mwoyi atuuta nkoka awu, adi avungulula dibeji adi ne adivwija dinefuke, dipole ne dya kalolo, dya cijila ne dyanyishiibwe kudi Nzambi. Pa nanku Mukalenge Nzambi asweku atumyamine mâyi, diloolo edi, bwa katwikadi mêmè to; kadi netwikale mabeji malenga mu mushindu wa ne bantu badi baseesuke baamona mwa kusômbela mwinshi mwa mucu wa dileji dyetu ne kupeta diikisha dya misuuka yabo.

10 Mpindyewu ndi muswe kwangata cyena-bwalu, diloolo edi, bu Mukalenge mwa kwanyisha, ne ndi nkoka kaacikolokolo kakese aka anu pabwîpi bikole menemene, bwa dipangila dya dîyi. Ndi muswe bwa, ku dibala edi dya Ebelu 1.1, ndi muswe kwangata cyena-bwalu cya ne: *Nzambi ÛDimanyishila Ku Ngiikadîlû Yëndè*. Ngiikaleku mwa kwambulula cyôci aci cyakabidi, bwalu ndi mumanye ne bipatudi bya mêmè ebi mmbibi kaaba aka. Nzambi udi uDimanyishila ku ngiikadilu Yende.

11 Mpindyewu, pamwe ne cintu cyônsò citu anu cidimanyishila ku ngiikadilu yaci. Nenku ndi ne ndambu wa Mifundu kaaba aka yîndi muswe . . . ne bîndî mufunde, bîndî muswe kwikala

ndeedila. Mpindyewu, ngiikadilu wa cintu kana cyònsò eci ki utu umanyisha cidi cintu aci.

¹² Mpindyewu, anu mùdì mu bufuki bwònsò emu, bilòngò bitu bimanyikila, misangu yàbùngì, ku ngiikadilu yabi. Byòbì bisangayibwa bitwangane pamwe, eci ciikale cya mushindu mushiilangane ne cikwabo, ngiikadilu wa cilòngò aci ki wàmanyisha ne ncilòngò kaayi aci. Ne bukwabintu bidi ne mwoyi bya mu cisuku, misangu yàbùngì. . .

¹³ Mêmè ewu, ntu cilembi. Nenku bikengela umanye ngiikadilu wa nyama ùdì wipata awu, cyanaana mîngà misangu udi mwa kudingiibwa. Cileejilu, bu mudi Stone Sheep Iwà mu Colombie Britannique mwamwa. Mvwa nsanganyibwa anu kwinshi kwa Yukon mu movù wa mabeji apoopoka wàshàadi ewu, bânà beetu babidi baa balume mwaba ewu bavwa naanyi, nenku tuvwa twenda tutwa buluwà.

¹⁴ Mpindyewu wêwè kuyi mumanye dishiilangana to, paudi wenda ujikangana ne mukooko anyi kashà apu, kwèna mufwanyine kumona dishiilangana to pawikala kuyi cilembi wa kateelateela. Bwalu, yidi yipanda mipwa ya mushindu wa mwomumwe; yidi yela bidya padiyi yinyeema apu. Kadi paudi umona umwe mwimane pa bule, musokoke mutu wende, mona's, udi—udi mufwanyine kumanya dishiilangana anu ne lutatu. Yidi yamba kwikala bunene bumwe Iwà mu citupa cya cibelu eci; ncitooke, anu mùdì cya kashà amu. Mbifwanyine kwikala bikole be bwa kuyisunguluja. Kadi nsengu yende nyidi yimanyisha ngiikadilu wende, ku nsengu ayi. Mukooko udi ne lusengu ludivunge, kadi kashà kadi ne nsengu ya mapanda mibaaluluke. Ne cintu cikwabo, kashà kî nkafwanyine kubànda kuya too ne kuulu kwa mukuna kwaka to, bwa kudya.

¹⁵ Ne pashiishe mbuji, padiye wenda wenda, yêyè pende, kudi ngiikadilu kampanda mu mbuji, ne mu mukooko, mu mushindu wa ne bikengela umanye dishiilangana munkaci mwayi, bu wêwè mwa kusanganyibwa kuulu kwa mukuna kwaka, bwalu yònsò ibidi itu isòmbela kuulu kwa mukuna kwaka. Bikengela umanye dishiilangana. Kadi wêwè mutangile bîmpè, mbuji udi utetuka padiye wenda wenda apu; padibi ne, mukooko udi ushindika bikono byawu panshi mushindu ewu, padiwu wenda apu. Ngiikadilu ngwa mushindu udiye upanda mupwa wende. Udi umanyina nyama ùdì wipata ku ngiikadilu yidiye uleeja ayi, ne ku mushindu udiye wenza, ne ku bidiye udya, ne bikwabo byònsò. Ûdì ùdìmanyishila ku ngiikadilu wende. Ne pashiishe bunda anu umwepele, kadi utangile umone cidi cyènzekà, udi mwa kwamba mushindu udiye uya. Udi mwa kusungulujila ku ngiikadilu wa nyama mushiilangane.

¹⁶ Pashiishe nukaadiku bamone, ncyèna mumanye ní nudi naayi muneemu emu anyi kanwena naayi to, nyuunyi ya mvlà; ee, cibovù ki dînà menemene dya yôyi ayi, ne nyuunyi wa

cibonkola. Nyuunyi wa cibonkola udi bunene bwipacila bwa luvilà. Ne paudi uyimona yònsò ibidi yibuuka, yònsò ibidi yidi yamba kwikala nyuunyi ya mushindu wa mwomumwe. Pawikala kuyi mwa kumona diikala to, kadi uyitangile anu cyanaana, udi mwa kwamba ne luvilà ndwèpi. Nyuunyi wa cibonkola udi ubuuka, byenze bu, buludiludi. Kadi luvilà lwòlò, ludi lupaapala; padilu lupaapala apu, ludi lwapweka lwàbànda, lwapweka lwàbànda. Nwamonu's, ludi ludyenza bu ludi lwela cidya cileepa, nunku ewu, ne udi mwa kwamba ne ki ngiikadilu wa luvilà nyêyè awu, mushindu udilu lubuuka.

¹⁷ Nwênù bamona kà—kàlumbu padiku kapatuka, mushindu udiku kàbànda muulu. Nunku pashiise utangile pawikala usanganyiibwa mu cisense, mwaba ùdi kàlumbu kafwanyine kusanganyiibwa, ne nyuu—ne nyuunyi wa dikàsàkadì. Nwênù baabilembi nudi bamanye cyôci aci. Nyuunyi wa dikàsàkadì wa Wilson ne dikàsàkadì, yidi yidimanyishila ku mushindu udiyi yipatika ne mushindu udiyi yiya. Yidi yidimanyishila ku mushindu wayi wa dibuuka, bwa ne udi nyuunyi wa mushindu kaayi. Ki bwa cinyi, wêwè muyiteeleje anu cyanaana, udi anu mwa kwamba ne ncikampanda aci, mushindu udiyi mupatuke awu, cidieye aci, ku ngiikadilu wa dibuuka dyende.

¹⁸ Byenze mùdi muntu mulume ne muntu mukaji. Bònsò bubidi bwabo mbantu, kadi muntu mukaji udi ne ngiikadilu mishiilangane ne ya muntu mulume. Mwva mbala kaaba aka, kukaadi cikondo kampanda, pa bidi bitangila Solomo ne mukalenge-mukaji awu. Ncitu mwanji kufikaku ku diyiisha dya Diyiisha dyanyi dikese adi mwaba ewu to, nnuyiisha nwênù, pa mukalenge-mukaji wa ku Sud awu, paakalwaye bwa kumona Solomo, ne kumona dipà dya dijingulula adi. Mwva mbala pa cyôci aci, mwab'ewu anu abidi adi panshi aa, nunku bavva bamba, ne: "Cimwe cya ku bintu bikole mwa kuumvwa cyàkatèkiibwà kumpala kwa Solomo, civwa ne, mukalenge-mukaji ewu wakangata muntu mukaji, anyi bantu bakaji, eyowa's we, kubavwadikaye bilàmbà bu bantu balume."

¹⁹ Mpindiyewu, aci civwa cyenyi mu diine dituku adi, kadi ncya bushuwa ne cikaadi cya leeluleelu, bwa leelu ewu. Nunku—nunku nwênù's nudi bamanye ne mbibi. Bible mmwambe ne muntu mukaji kèna ne cya kwenza aci nansha. "Ncinyangu bwa muntu mukaji kuvwalaye civwalu cidì cyakanyine muntu mulume." Nunku Nzambi utu kayi ushintuluka awu ngudi mwambe nanku awu, pa nanku aci ncilelela.

²⁰ Pa nanku tudi tusangana ne Solomo, kayi anu mubakenkete to, kubambilaye bwa kwendabo anyi bwa kwenzabo cintu kampanda, ki dyakamwe kwambaye ne: "Mbantu bakaji." Nwamonu's, wakamanya mwa kwamba ku ngiikadilu wa muntu mukaji awu, mushindu wakaditwalaye, bwa ne uvwa mmuntu mukaji kayi muntu mulume to.

21 Ne pashiishe pamwe ne bintu byônsò mushindu awu, cintu ne cintu ne ngiikadilu yaci. Anu mudi bantu bààbùngì biikale ne cibòko, ne cyanza cya dyabalume. Badi ne ngiikadilu wa mushindu udibo baditwala. Udi mwa kwamba ne mmuntu mwena cyanza cya dyabalume anyi mmwena cibòko, ku mushindu udibo baditwala, mushindu udibo misangu yônsò boolola cyanza bwa kukwata bintu ne cyanza cya dyabakaji anyi ne cya dyabalume.

Neuku vulukaayi ne, Yesu uvwa ne cintu bu aci, ne . . .

22 Byanza bibidi mbyambe kwikala anu . . . Mbya mwomumwe. Bidi ne tushoonyi twa minu ya byâlà twa mwomumwe, tushoonyi twa minu mikwabo, minu itaanu; kantêkenênê, cipwita-musabu, ne mikwabo. Anu mùdi cyanza cya dyabalume ne cyanza cya dyabakaji biikale ne minu ya mushindu wa mwomumwe amu, pa ciibidilu, byanza bya bunene bumwe, anu menemene. Kadi dishiilangana dimwepele dîdiku ndya ne, mu byôbì amu, cimwe ncyà dyabakaji ne cikwabo ncyà dyabalume. Ki dishiilangana dimwepele dyûdì mwa kwamba ndyôdì adi. Cimwe ncyà dyabakaji, cikwabo ncyà dyabalume.

23 Pa nanku mu cyôci aci, Yesu wakamba . . . Ndi mufwanyine kwelaku kaacintu kakese panshi mwab'ewu. Yesu wakamba, mu Maataayi 24, ne: "Ngiikadilu ya Nyuma neyiikale yamba kufwanangana mu matuku a ndekeelu, mitambe kufwanangana mu mushindu wa bifwanyine kuseeswisha ne basungula mene bu ne bivwa mwa kwenzeka." Nwamonu's, mbafwanyine anu . . .

24 Angata cyanza cyebe aci kadi ucilame cyela muulu. Nwamonu's, wêwè kuyi mutangile bîmpè to, cimwe cya ku byôbì abi cidì cimweka anu bu cikwabo aci, mu mushindu wônsò, kadi cimwe cya ku byôbì ncyà dyabakaji ne cikwabo ncyà dyabalume.

25 Mushindu awu ki udi nyuma ayi mu dituku dya ndekeelu. Mmyenze anu bu yidi mifwanangane, kadi yidi ne ngiikadilu udi uyimanyisha. Umwe ngwa cya bushuwa, ne mukwabo ngwa mashimi, ne udi mwa kumanyikila ku ngiikadilu wende.

26 Nyuma wa Nzambi udi mwa kumanyikila ku ngiikadilu Wende. Nwamonu anyi? Nyuma wa Nzambi, ne nyuma wa ekeleeziya. Kudi nyuma wa ekeleeziya, ne Nyuma wa Nzambi udi kakuyi mpatà to kayi mufwananganeku ne nyuma wa ekeleeziya to, nansha kakese.

Kutu nyuma wa cyena mangumba.

27 Kutu nyuma wa cyena ditunga. Kutu nyuma wa ditunga. Ditunga dyônsò edi, pândì nyamu, paudi uyamu, udi usanganamu nyuma mushiilangane. Mvwa muye mu Finlande, bantu balenga be, kadi muvwa nyuma wa cyena Finlande. Nya mu Allemagne, mwikale nyuma wa cyena Allemagne.

28 Mwaba ewu anu abidi adi panshi aa, mvwa nya ne mukajaanyi, patucivwa basômbèle mu Indiana apu, kukaadi

bidimu ndambu, lwà ku makajiinyi makese a byakudya kwaka. Ncivwa mfuminaku ku dyalukila kumbelu. Bivwa bikengela twètù kuya kakeba byakudya. Kadi mu njila ngenda nyaku, twètù. . . Muvwa mmu muvù wa luuya, kanwena bafwanyine kuciitabuuja to, kadi twètù kusanganamu inàbànza kampanda muvwale nkanzu. Kadi bivwa bikemesha be mu mushindu wa ne, mèmè. . . Cyakampapula's. Mèmè—mèmè kwamba ne: "Tangila kwaka, cyacya's cidi cimweka cya dikema, wawa mukaji mmuvwale nkanzu." Bakwabo bònsò bavwa bavwale bilàmbà bivwa kabiyi. . . kabiyi bikumbanyina muntu mukaji to. Ki—ki kwambaye. . . Mèmè kwamba ne: "Ee, s'cidi anu nyuma wa cyena Amerike menemene, wamonu's, nyuma wa Amerike."

²⁹ Mpindyewu, nyuma wa Amerike, udi. . . diikale ne cya kwikala ditunga dya beena Kilisto, kadi nyuma wa ditunga edi kî ngwa bwena Kilisto to. Ndifwanyine kubiikidiibwa ne nditunga dya beena Kilisto, kadi didi kule ne ciine aci mu ntanta wa mùliyô wa kilomeeta, mu ngiikadilu wadi. Pa nanku, mukaji ewu, mèmè kwamba. . .

Yêyè ne: "Ee, twètù katwena beena Amerike anyi?"

³⁰ Mèmè kwamba, mèmè kwamba ne: "To. Tudi basòmbèle muneemu. Nditunga dyetu. Tudi—tudi—tudi basòmbèlemù. Tudi badinange. Nditunga didi ditambe bwîmpè bwa buloba bujima. Kadi, nansha nanku, twètù katwena beena Amerike to." Mèmè kwamba ne: "Twètù tudi balediibwe ku Dyulu. Nyuma Mwîmpè mmupweke, nenku twètù tudi baa mu Bukalenge kampanda. Kî mbwa pa buloba ebu to." Mèmè kwamba ne: "Ki bwa cinyi beetu bânà baa bakaji batu bavwala nkanzu, biikale ne nsuki mile, kabayi balaaba bilaabu bya kwîsù to. Wamonu's, yabo ngiikadilu yidi yibamanyisha bu 'cijila kudi Mukalenge,' baa ku Dyulu."

³¹ Ki bwa cinyi, twètù tudi twenda tukeba Bukalenge kampanda. Tudi twenda tukeba Mfumu wa ulwa kwangata bantu Bende bwa kuya naabo mu Bukalenge Bwende. Nenku bôbò abu mbamanyikile ku yabo—yabo ngiikadilu, ya ne abo mabanji kî ngaa pa buloba ebu anyi a ditunga edi nansha. Ngaa ku Dyulu, mu Butumbi. Ki bwa cinyi, bôbò: "Badi benda bakeba Cimenga Cidi Muciibaki ne Mucyenji mwikale Nzambi." Bôbò mbamanyike anu menemene.

³² Mvwa mwa kujingaku bwa kwikala ne dîyi dikumbane bwa kunuyiisha diloolo kampanda. Kadi ndi—ndi ncyepuka's. Mpindyewu, mumanyikile ku ngiikadilu yende.

³³ Tudi tusangana cileejilu cîmpè mwab'ewu mu cikondo cya Izaleela, pavwabo ne cya kubwela mu buloba bulaya. Nenku Nzambi uvwa mubabiikile bilondeshile mulayi Wende. Wakambila Abraham ne, yêyè uvwa. . . dimiinu dyende divwa mwa kusanganyibwa mu ditunga dyenyi, munda mwa bidimu nkama inaayi, ne pashiishe Yêyè uvwa mwa kumusungila ku cyanza cinene cya bukole, nenku bavwa mwa kuya ku buloba

kampannda, bùvwà bulayiibwe, cikondo aci, mùvwà mabeele ne bwici bituuta nkoka. Nenku pakaavwa cikondo cya mulayi cyenda ciseemena, kwakalwa Pâlò kampannda—kampannda uvwa kayi mujingulule mudimu munene wa bwambi wa Yozefu uvwaye naawu munkaci mwabo amu to.

³⁴ Nenku, eci, Nzambi kujuulaye muprofeta dîna dyende Mòsà. Ne muntu mwine awu uvwa mulongeshiibwe mu lungenyi lwònsò lwa beena Ejipitu. Kakuyi mpatà to yèyè uvwa muntu munene, wa meeji matwe, wa mamanya a mu mutu, bwalu yèyè uvwa mwa kulongesha beena Ejipitu lungenyi. Bivwa bimweke anu bu ne yèyè nguvwa muntu uvwa mukumbanyine—mukumbanyine anu menemene bwa disungilangana.

³⁵ Kadi, nudi numona's, citudi twètù tubiikila ne ndisungila aci, ne cidi Nzambi Yèyè ubiikila ne ndisungila, s'kudi ndambu wa dishiilangana.

³⁶ Mpindyewu tangilaayaaku mwine muntu ewu ne nsòmbelu wende yònsò wa bukalanga awu. Ùvwa mumanye ne yèyè uvwa mulediibwe mbwa kusungila bânà baa Izaleela. Kadi, ne tulaasa twende twònsò tulonga atu, ki cyende cyònsò civwaye mumanye, ne mwikale mumanye ne ùvwa mubiikidiibwe kudi Nzambi bwa kwezayye mudimu awu, ùvwa ne twende twònsò... Ùvwa ne dipolome dyende dya B.A., ne dya Ph.D., ne dya LL. D., ne bikwabo. Ki kupatuka e kuyaye bwa kusungila Izaleela, kadi kupangilaye mudye ne butu.

³⁷ Mpindyewu monaayi, bivwa byenze anu bu ne, yèyè mwikale ne cya kubikula mfumu wa Ejipitu, bwa kushaalaye Pâlò, bwa ne wamona mwa kusungila bânà baa Izaleela paanyima paa yèyè mumane kushaala Pâlò, bwalu yèyè nguvwa ulondela bwa—bwa kubànda pa nkwaswa wa butumbi. Kadi, nudi numona's, aci, mu dicyenza dya mu mushindu awu, kacivwa mwa kwikala cimanyishe ngiikadilu wa Nzambi mu disungila dya cisamba Cyende nansha.

³⁸ Ùkaavwa mwambe ne Yèyè ki uvwa mwa kubasungila. *Yèyè* ki uvwa “ubasungila ne cyanza cya bukole,” kaciyi Mòsà ne cilwilu cya bukole to, kadi Nzambi ne cyanza cya bukole.

³⁹ Tudi tusangana ne muprofeta ewu wakanyeema e kuya ne ùkaavwa mu cipeela kukaavwa bidimu makumi anaayi. Byakangata Pâlò bidimu makumi anaayi bwa kumupayaye dilonga dya tulaasa, ne byakangata Nzambi bidimu makumi anaayi bwa kumupatuladi. Pa nanku tudi tusangana ne, dîngà dituku, yèyè, mundekeelu mwa cipeela, wakatuutakeena ne Mukalenge Nzambi mu cipuka cidi cilakuka kapyà, mu mmwenekelu wa Dikunji dya Kapyà disanganyibwa mu cipuka. Ki kulombiibwaye bwa kukopola bisabaata byende, ne, buloba buvwaye mwimane abu buvwa bwa cijila. Mpindyewu tangilaayaaku muntu mulenga ewu, mupiluluja, mulonge tulaasa, bu muvwaye mene, tangilaayi numone dishintuluka dya

ngiikadilu yende paanyima paa yêyè mumane kutuutakeena ne Nzambi. Wakenza bipite. . .

⁴⁰ Mîngà misangu Nzambi utu wenza bintu mu mushindu mupeepele menemene, ne mushindu mukutakane menemene, bwa ngeelelu wa meeji wa mu musunya. Monaayi muntu uvwa mupangile mudye ne butu awu; mwikale ne bilwilu byônsò bya beena Ejipitu ne bikwabo byônsò ku luseke lwende bwa kwenzaye diswa dya Nzambi, ne tulaasa twende twônsò tulonga atu, mwikale ne bidimu makumi anaayi, mu nsòkà ya bunsongaalume bwende. Ki yêyè ewu, ne bidimu makumi mwandamukulu, paakacyabu mu dinda, ne mukajende muzangame pa kampundu, ne mwânà mwambula ku lubese, ne dikombo mu cyanza, upweka mutangile mu Ejipitu, bwa kuya kakwatanganaye ku bukookeshi bwende. Nwênù bàtù bamba bwa bintu bya macimbu's! Kadi aci's civwa cileeja patooke ngiikadilu ya Nzambi, bwalu Yêyè wakapeta muntu uvwa mwa kwitabuuja Dìyì Dyende. Kwajiki. Bwalu buvwa ne, nudiku peenu mwa kudifwanyikijila dibucikila dya muntu umwepele wenda uya mu Ejipitu, mwômò amu, muvwa cilwilu cijima cipangile amu anyi? Kadi civwa ncinyi? Ngiikadilu wende, màyelè ende akashintuluka. Ukaavwa uya mu Dîna dya Mukalenge ne: "NDI EWU ÛNDÌ." Bwalu buvwa ne, yêyè wakakwatangana ku bukookeshi bwende. Wakacyenza's, bwalu ùvwa uya mu Bukole bwa Mukalenge.

⁴¹ Wenda uya mu njila, mwikale upatuka ne Izaleela mutangile ku buloba bulaya, kutwilanganaye ne mwanaabo wa balume, mwanaabo wa cyena mangumba, Moaba. Mpindyewu, Moaba, nansha bishi, kabavwaku bampangaanu to. Bavwa mbânà baa mwânà wa bakaji wa Lota. Umwe wa ku bânà baabo balela ki—ki wâkalela Moaba.

⁴² Mpindyewu, mwaba awu, ndi muswe bwa nwamonaayi matunga abidi aa, mu dipangakana. Ki Ejipitu nyêyè ewu, kakese, tuubantu tutangalake, kabayi ne ditunga dya kuyabo, kabayi ne balombodi anyi mfumu, anyi nî ncinyi, anyi nansha bantu baa myânzù mitumbuke munkaci mwabo, anu cisamba paaci nanku awu biikale mu njila batangile ku buloba bulaya. Ki bôbò abu mwaba awu bikengela bwa bakosolwele mu buloba bwa Moaba amu. Civwa anu mu njila menemene wa mulayi.

⁴³ Ne beena Moaba, bôbò paabu, bavwa beena kwitabuuja baa Yehowah, ne biikale ne muprofeta. Ne Izaleela uvwa ne muprofeta. Bônsò babidi bavwa ne baprofeta.

⁴⁴ Kadi mpindyewu monaayi, baakafika mu mwaba uvwa muprofeta wa cisamba cilongolola aci mwikale upweka bwa kwela cisamba cikwabo eci mulawu, bwalu civwa cyôci anu cilalakanyi cyetu eci, kacyi ne mwaba paawu ne ki wôwò ewu wa disômbela to. Pa nanku bôbò kupwekaku.

Nenku tangilaayaaku baprofeta babidi abu: Bwa baswe kwamba maalu muvwawu, bônso babidi bavwa menemene anu mu bulelela. Bwalu, monaayi ne, Baalama, mwepiskopo awu, wakabambila ne: “Mpindyewu ngiibakilaayi byoshelu mwandamutekete.”

⁴⁵ Mwandamutekete ki nomba mukumbanangane wa Nzambi, mwikale uleeja Bikondo Mwandamutekete bya Ekeleeziya, matuku mwandamutekete a difuka, ne bikwabo. Mpindyewu monaayi, mwandamutekete, Nzambi mmukumbanangane mu mwandamutekete.

⁴⁶ “Byoshelu mwandamutekete, ne pa cyoshelu cyônso kuteekapu cimpanga cya—cya ngombe.” Mpindyewu aci’s ki cyoshelu anu cya mwomumwe menemene civwabo naaci mu cibanda mu cituudilu cya Izaleela mwamwa. Ki bôbò badi mu Izaleela mwamwa abu, ne cyoshelu cya mwomumwe anu cya bwena cidibo naaci ku mukuna eku; ne mulambu wa mwomumwe awu, cimpanga cya ngombe ne cimpanga cya ngombe; muprofeta ne muprofeta. Bisamba bibidi, mu dipangakana.

⁴⁷ Cileejilu cipwangane menemene cya dituku ditudi ne mwoyi edi, bu ne tuvwa ne dîbà dya kubwelamu. Monaayi, Nzambi wenza cyôci eci mu cifwanyikijilu, bwa twamona mwa kujandula, mu dipalakaja.

⁴⁸ Mpindyewu, Baalama, yêyè pende wakalomba cimpanga cya mukooko pa cyoshelu cyônso. Aci civwa cyamba bwa diitabuujja divwaye naadi mu Maasiya uvwa ne cya kulwa. Cimpanga cya mukooko, mukooko mulume, ki mulambu wa mwomumwe uvwabo naawu mu Izaleela mwamwa; mu cituudilu cya Izaleela mwamwa, ku mukuna eku kùdi. . . mu Moaba emu. Nenku. . . Mùvwà bintu ne cya kwikala, bônso babidi bavwa mu bulelela, kadi, monaayi, mùvwà bintu ne cya kwikala mu dilongesha.

⁴⁹ Kadi muprofeta umwepele mu cituudilu cya mu Izaleela mwamwa uvwa ne ngiikadilu ya Nzambi ne Dîyi dya Nzambi. Yêyè uvwa mushaale ne mulayi wa Nzambi bwa cikondo aci, bwalu yêyè uvwa mu njila uya mutangile ku buloba bulaya. Nwamonu anyi?

⁵⁰ Mpindyewu, bwa pa bidi bitangila mùvwà bintu ne cya kwikala, Baalama, Baalaka, bavwa bafwanyine kwikala bamanyishiibwe anu mùvwà Mòsà amu.

⁵¹ Kadi, nudi numona’s, Mòsà, mwikale muprofeta mujaalame wa Nzambi, kayi anu ne luseke lwa mùvwà bintu ne cya kwikala amu to, kadi uvwa ne dimanyiiibwa dya Nzambi. Nwamonu’s, uvwa mu njila wa mudimu, anu civwa cilayiibwe menemene bwa cikondo aci; kaciyi bwa cikondo cya Noa to, kadi bwa cikondo cya musangu awu. “Nênye neenu ku buloba budi mabeele ne bwîci bituuta nkoka.” Bavwa mu njila benda baya, ne Izaleela uvwa mufwanyikijiibwe ne muprofeta wabo, Mòsà, ne Mukenji

wa cikondo aci. Ngiikadilu ya Nzambi mimanyikile munda mwa Mòsà. Dikunji dya Kapyà divwa dyenda dimulonda. Ûvwa kabidi ne difuta dya cibawu diikale mu cyenzedi; kabiya bya baakula pa dyôdi adi to, kadi bavwa naadi mu cyenzedi. Kadiyi dya dicilwalwà to; ndidiku mpindyewu mene!

⁵² Monaayi, yêyè uvwa ne nyoka wa cyamu cya kabanda uvwa mubandishiibwe bwa màsaamà ne ditakanyika bya cisamba, ki bwa cinyi Mòsà uvwa wenza dyondopa dya kudi Nzambi. Ûvwa ne difuta dya cibawu, nyoka wa cyamu cya kabanda, mwikale cimfwanyi cya mùvwà Nzambi mu cituudilu, ne bantu bavwa batangila ku nyoka wa cyamu cya kabanda awu ne biikale bondopiibwa.

⁵³ Ûvwa kabidi ne Lubwebwe lutuuta lwenda lumulonda. Ne ciine aci civwa cimanyisha Nzambi, bwa kulama Mâyì a Mwoyi munkaci mwabo, disanka ne lupandu, bwa kabalu kubutuka to kadi biikale ne Mwoyi wa kashidi. Civwa ncimfwanyi cya. . . Lubwebwe lutuuta alu mu cipeela luvwa ncimfwanyi cya Kilisto mwikale mutuuta.

⁵⁴ Pashiishe, bavwa benza lwendu mu njila wa mulayi. Aci civwa ndimanyishiibwa dikwabo, bwa kuleeja ngiikadilu wa Nzambi. Nansha mukwabo ewu mwikale mwenji wa maalu bu mudiwu bishi ne Dìyì amu; yêyè uvwa ne dyenza dya maalu bu muvwawu, musàkidilekù ne dimanyishiibwa, ne ngiikadilu wa Nzambi munkaci mwabo. Nzambi uvwa udimanyisha Yêyè mwine. Baprofeta babidi, bônso babidi biikale baprofeta, ne bwônso babidi biikale benji baa maalu bu mudiwu; kadi Nzambi umanyishila ngiikadilu Yende mu Mòsà, bwalu yêyè nguvwa ne ngiikadilu ya Nzambi.

⁵⁵ Mpindyewu, kabidi, ngiikadilu ya Nzambi yitu misangu yônso anu mitambe mfukilu, bwalu Yêyè mmutambe mfukilu. Nzambi utu mutambe mfukilu. Citu anu cya pabwaci, misangu yônso, ku mmwenenu wa cyena leelu wa ngeelelu wa meeji wa dituku adi. Nutu bamanye aci. Nzambi utu misangu yônso anu munyangakajenyangakaje ndongamu, bwa—bisumbu bya ntendeleelu mu cikondo ne cikondo cyônso cikaadiku cipite eci.

⁵⁶ Ne kakutuku musangu nansha umwe ukaadi muntu anyi cisumbu cya bantu badyênzèleku bulongolodi bashindameene pa mukenji kampanda kabayi bafwe ne beediibwe làà ne kabayi mwa kujuukaku kabidi to. Kakwenaku bwalu bulonda bwa bwena abu to. Ba-Luthériens, ba-Presbytériens, ba-Méthodistes, ba-Baptistes, beena Mpenta, ne bikwabo, kabeena bajuukaku kabidi to, pakaadibo baya bwa kuCisanga bu cisumbu.

Nzambi utu ukwata mudimu ne bantu-nkaaya.

⁵⁷ Monaayi, Yêyè udi ushiilangana menemene ne ngeelelu wa meeji. Nwamonu's, tudi tupambuka mu mmwenenu kampanda, nenku bikengela tùCitàbùùjè mushindu *kampanda*. Nenku pashiishe Nzambi udi ulwa ne Dìyì Dyende didiYe mulaye, ne

uDimanyishila Yèyè mwine mu dyôdi Dîyî adi. *Eci* cisumbu kacyi mwa kuya ku Dyôdi adi to, bwalu kacyna ciDiitabuuja to. Nwamonu’s, cikaadi cyôci ciine cimane kudikosolola naaDi.

⁵⁸ Byenze bu Yozefu, ùvwa mwânà wa Davidi, ne muntu mwîmpè, Yozefu bayende wa Mariya awu. Ûvwa muntu mwîmpè, ne kakuyi mpatà to ùvwa ubala Bible, mikanda mivunga ayi, bya kashendende, bwalu. . .ne ùvwa mwindile Maasiya uvwa ne cya kulwa, ne yèyè’s ùvwa ne cya kwikala mumanye civwa Mifundu myambe ne necyenzeke. Yeshaayi wakamba ne: “Virgo neimite difu.”

⁵⁹ Ee, mpindyewu, yèyè uvwa useeselangana ne nsongaakaji ewu, Mariya, pâmwâpa mwikale ne bidimu dikumi ne mwandamukulu, kadi pâmwâpa yèyè ukaavwaku mukole mushindame. Nunku pakaavwabo bamane kudiswika bwa kubwela mu dibaka, kumwekaye ukaadi ne difu. Mpindyewu aci civwa bu bwalu bukole bwa Yozefu kwangataye dipangadika pa bwalu abu. Kakuyi mpatà to Mariya ukaavwaku anu mumwambile bwa dimumwenekela dya Gabriel. Kadi tudi tumona ne, mushindu uvwa wende ngiikadilu umulombola awu, yèyè wakacyela mpatà.

⁶⁰ Mpindyewu yèyè wakasanganyiibwa mwikale ne difu kumpala kwa kabayi banji kuselangana to. Paabi, mu Bible, dinyooka dya bwalu abu ndufu, ku dyashiibwa dya mabwe. Mukaji kayi mwanji kusediibwa wimita difu, bivwa bikengela kwashiibwaye mabwe. Kakubwa bya bundumba mu Izaleela to. Civwa cibengiibwe. Nunku tudi tusangana ne, mu Dutelonoma, mmudibo batwambila cyôci aci.

⁶¹ Mpindyewu tudi tusangana ne, Mariya, bivwa bimweke anu bu ne ùvwa ukeba bwa kwangata Yozefu anu bu ngabu bwa cyenzi kampanda ciwaye yèyè mwenze. Bwalu, piikalabi ne yèyè ùkaavwa musanganyiibwe ne difu kumpala kwa bôbô kuselangana, dîbà adi’s ùvwa ne cya kwashiibwa mabwe, nunku ùvwa ne cya kupeta muntu kampanda mpindyewu uvwa mwa kwimana bu ngabu bwende yèyè. Nunku bivwa bimweke, anu menemene, bu ne ki ciwaye uteeta bwa kwenza.

⁶² Kadi Yozefu utangila mu mèsù ende manene malenga awu, ne yèyè pende mufwanyine kwamba ne: “Yozefu, Gabriel’s ngudi mungambile ne: ‘Nyuma Mwîmpè neakubwikile ne mundidimbi wende, ne Cintu ciikala ciimiciibwe munda mwebe—munda mwebe eci ncyà kudi Nyuma Mwîmpè. N’Nzambi. Ki mwikalaCi mwa kubiikidiibwa ne, “Mwânà wa Nzambi.”” Nunku, Yozefu, yèyè—yèyè—yèyè uvwa muswe kwitabuuja cyôci aci, kadi civwa cya pawaci be. Kacyakacya aci kacivwaku cyanji kwenzeka kumpala to.

⁶³ Nunku anu mushindu awu ki udibi leelu ewu. Bu ne twètù aba tuvwaku bafwanyine. . . Bu ne mvwaku ne mushindu kampanda wa kufikisha bantu ku dimona mushindu wa

pabwawu wa cintu kana cyònsò, piikalaci cimanyishiibwe kudi Dìyì, pa dîbà adi's ngiikadilu yaci yidi yijaadika ne ncintu kampanda. N'Nzambi mu cyenzedi.

⁶⁴ Bivwa bikengela bwa Yozefu kwikalaye mumanye cyôci eci. Bivwa bikengela bwa yêyè kwikala mumanye ne: “Virgo neimite difu.” Kadi yêyè uvwa ne meeji matooke pa bwalu abu. Kavwa muswe kumwipata to, mu musokoko, kadi ù—ùvwa welangana meeji bwa kucyenza.

⁶⁵ Ki pa dîbà adi Mwanjelo wa Mukalenge kumumwenekelaye mu ciloota. Nukaadiku badikonke ne Wakamumwenekela mu ciloota bwa cinyi anyi? Kakuvwa bapofeta mu matuku awu to. Ciloota cyabo civwa cipeepele pepelee, mu mushindu wa kaciyi cikengela dymvwija to. Kwambaye ne: “Yozefu, wêwè mwânà wa Davidi, kuciinyi bwa kwangata Mariya mukajeebe kwebe to, bwalu cidiye mwimite munda mwende aci ncyà kudi Nyuma Mwîmpè.” Nwamonu's, pa dîbà adi, aci kukosaci bwalu. Nwamonu's, Wakalwa kudiye mu ciloota, mushindu mulondele. Kadi, nudi numona's, kakuvwa mupofeta muntwamu bwa kumanyishaye Dìyì adi to, dya ne: “Ewu ki yêyè virgo wîkala mwa kwimita awu.” Nwamonu anyi? Pa nanku, ki bwa cinyi, Wakamumwenekela mu ciloota, bwalu ùvwa ne meeji matooke ne mululame ne muntu mwîmpè.

⁶⁶ Ne mêmè ndi ngiitabuujà ne Nzambi nealwe kudi muntu mwîmpè kana yònsò ewu, mu mushindu kampanda, ne umanyisha byenzedi Byende kudi muntu mwîmpè awu, bwa cikondo aci, piikalabi ne mwine muntu awu mmubiikidiibwe kudi Nzambi bwa cikondo aci.

⁶⁷ Mpindyewu, kadi civwa cya pabwaci menemene, mu mushindu wa ne bôbò kabavwa anu mwa kucyakidila bipeepele nunku to. Kadi, misangu yònsò, dimwenekelangana bilondeshile Dìyì dilaya dya cikondo, mushindu wònsò wa pabwawu ewu.

Mpindyewu kudi bamwe bantu badi bafwanyine kuya eku ne eku, bamba ne: “Ee, *cikampanda's* ncyà pabwaci, s'n'Nzambi. *Cikansanga's* ncyà pabwaci.”

⁶⁸ Kadi, nudi numona's, bikengela ciikale cimanyishiibwe kudi Dìyì, ne Dìyì ki Nzambi. Nwamonu anyi? Ne pashiishe ngiikadilu wa diine dimanyishiibwa edi udi umanyisha ne nganyi mwine awu, bwalu Nzambi mmwambe ne, “*cikampanda* necyenzeke,” nenku paaci cyenzeka. Nwamonu anyi? Ngiikadilu waci n'Dìyì dya Nzambi diikale dimanyishiibwa kudi ngiikadilu wa cidi munkaci mwa kwenzeka.

⁶⁹ Wakamba ne mu matuku a ndekeelu Neapongolole Nyuma Mwîmpè. Yêyè kucyenza. Ngiikadilu yaci's yakamanyisha ne civwa n'Nzambi, Dìyì Dyende dilaya. Nwamonu's, cidi anu cidimanyisha nkaayaaci misangu yònsò.

⁷⁰ Mpindyewu, misangu yònsò, dîbà dyònsò, cidi anu cilongolola dîyì ku cilema, padi Dìyì dyambiibwe bibi. Kacya

nukaavwaku bamone anyi? Muvwa mmu matuku a Noa, wâkalongolola cilema cya cikondo cya maalu a mamanya aci, ne Nzambi uvwa umacisha mâyi apatukila mu maulu. Ûvwa m'Môsà, nwamonu's, wâkalongololangana ku bilema pavwa bônso basombèle mu Ejipitu mwamwa, ne bikwabo, kadi bivwa bikengela bwa Dîyi dya Nzambi dilwe bwa kwikaladi dimanyishiibwe. Nenku Bulelela bwa Dîyi butu bulongolola cilema.

⁷¹ Ngânjì nnukonkeku cintu kampanda. Tudi bafwanyine kuya ndambu mu ndondo kaaba akâ. Ncyêna ne cya kuyiisha dilongesha anyi dilongesha dya nshindameenu nansha, kadi ngânjì nnukonkeku anu cintu cimwe cyanaana.

⁷² Yesu uvwa Dîyi. Tudi bamanye aci. Bible mmwambe ne ki muvwabi. Yone Munsantu, nshapita 1: "Ku cibangidilu kwakadi Dîyi, ne Dîyi dyakadi ne Nzambi, ne Dîyi dyakadi Nzambi. Ne Dîyi dyakavwijiibwa mubidi ne dyâkasombela munkaci mwetu." Yêyè uciidi anu Dîyi. Nenku pavwaYe mwa kujingulula meeji abu apu, s'bivwa bikengela bôbô kwikala bamanye ne civwa n'Dîyi, bwalu Dîyi dya Nzambi divwa dyambe ne ki civwaYe mwa kwenza. Yêyè uvwa Muprofeta awu.

⁷³ Mpindyewu monaayi, tudi tusangana ne paakalediibwaYe, mwikale ne bidimu bitwe ku dikumi ne bibidi, Wâkabânda ku difesto dya bisambusambu. Nenku bavwa baye kuntwaku ku Paasaka. Nenku, mu njila pakaavwabo baalukila, bakaavwa benze lwendu lwa matuku asatu kadi Yêyè mubajimine; bôbô kujingulula, kudyelelabo meeji, eyowa's we, badicinkila ne Yêyè uvwa munkaci mwa beena kwabo abu.

⁷⁴ Tudi bafwanyine kwenza dileesona pa cyôci aci. Aci's ncîdiku cyâbûngî menemene leelu wa Ndaaya ewu! Mpindyewu nwênù ba-Méthodistes, ba-Baptistes, ba-Presbytériens, ba-Luthériens, beena Katolike, cyônso cinwikala aci, nwamonu's, nudi nwenza cintu cimwecimwe aci. Nudi nwela meeji ne bwalu Wesley wakapeta ditabuluja dinene, Luther wakapeta ditabuluja dinene, anyi Mpenta wakapeta ditabuluja dinene, nudi nwela meeji ne Yêyè udi munkaci mwa bantu, paabi, misangu mikwabo Yêyè kayimu to.

⁷⁵ Baakaya kaMukeba. Baakaya kaMusangana penyi? Mwaba wakaMushiilabo awu, mu Yelusalema. Ne paakaMusanganabo apu, civwaYe wenza ncinyi? Mwânà mukese wa balume, wa bidimu dikumi ne bibidi, pâmwâpa kayi mubweleku mu kalaasa kapite kavwa mamw'Ëndè muMulongeshe aku to; kadi ki Yêyè ewu ukaavwa mu ntempelu, ukokangana ne baakwidi abu, pa Dîyi dya Nzambi. Ne bôbô baakakema bikole bwa lungenyi lwa Mwânà ewu. Bwa cinyi? Ûvwa Dîyi. Mpindyewu tangilaayi.

⁷⁶ Nenku mpindyewu kî nkunufwisha bundu to nwênù beena Katolike batu babiikila Mariya ne maamù wa Mvidi Mukulu abu, kadi lekelaayi nnuleejeku anu kaacilema kakese mwaba

ewu. Piikala ekeleeziya mwashila pa Mariya, tangilaayi numone cyàkenzekà. Mpindyewu yèyè awu wakajuuka e kwamba ne: “Kaa, tatw’Èbè ne mèmè tudi baKukebee, badile ne wetu wa binsonji ewu.” Tangilaayi dīyì adi, pa dībà adi yèyè’s wakapiisha bujaadiki bwende yèyè mwine. Wakamba ne: “Tatw’Èbè ne mèmè tudi baKukebee, badile ne wetu wa binsonji ewu.”

⁷⁷ Tangilaayi Dīyì adi. Yèyè uvwa Dīyì. Wakamba ne: “Kanwena bamanye ne Ndi ne cya kwikala mudifile ku maalu a Taatù Wanyi anyi?” Tangilaayi numone mudi Dīyì dilongolola cilema. Anu mwaba awu kumpala kwa baakwidi abu, kunyangakajaye bujaadiki bwende bwine. Mumane kwamba ne wakiimicishiibwa kudi Nyuma Mwîmpè, kadi apa ukaadi n’ă ne Yozefu nguvwa “taatù” Wende. Nwamonu mudi Dīyì adi dibakule cyôci aci ne lukasa lwônso anyi? Yèyè uvwa Dīyì. Mpindyewu, s’nudi bamanye ne mwânà wa balume wa bidimu dikumi ne bibidi kī mmufwanyine kwenzaku aci to. Yèyè uvwa Dīyì. Yèyè uvwa Dīyì dyakula dya cikondo aci, pa nanku ki bwa cinyi ngiikadilu mumanyishiibwe wa Nzambi uvwa munda mwa Kilisto. Yèyè uvwa ulongolola bilema. KwambaYe ne . . .

Bôbò baakamba ne: “Mona’s, twètù’s tudi bayiidi baa Môsà.” Nwamonu anyi?

⁷⁸ Yèyè ne: “Bu ne nuvwa bayiidi baa Môsà, s’nuvwa mwa kuMmanyà Mèmè. Yèyè awu wakafunda bwanyi Mèmè. Môsà awu’s wakamba ne: ‘Mukalenge Nzambi wenu neajuule Muprofeta mufwanangane naanyi.’ S’nuvwa mwa kuMmanyà Mèmè bu ne nuvwa bamanye Môsà.”

⁷⁹ Nenku, nwamonu’s, Dīyì ditu anu misangu yônso dilongolola cilema cya dituku adi. Kadi bantu kabatu baswe kuciitabuujà to. Bôbò batu bashaale anu kacya baakwataku, anu mwabo ne kale.

⁸⁰ Kadi’s Yesu wakalongolola mamw’Ëndè mumuledi. Nenku mamw’Ëndè uvwa mu dipanga, bwalu yèyè ukaavwa mumane kwamba ne ùvwa m’Mwânà mumwimicisha munda mwende kudi Nyuma Mwîmpè, kadi kukudimuna bujaadiki bwende e kwamba ne Yozefu nguvwa “taatù” wende, ne nguvwa tatwëndè wa—wa Yesu. Mpindyewu bu ne—bu ne Yozefu . . .

⁸¹ Bu ne Yèyè uvwa mwânà wa Yozefu, bu ne kuvwaYe mudifile kuvwa nku maalu a tatw’Ëndè, nunku’s Ûvwa mwa kwikala usanganyiibwa mu ditanda dya mabaya.

⁸² Kadi Yèyè uvwa mudifile ku maalu a Taatù Wende, mu Ntempelu mwamwa, utandisha malongolodi awu. Nwamonu anyi? Yèyè uvwa mudifile ku maalu a Taatù Wende, mucikàle anu Mwânà wa balume wa bidimu dikumi ne bibidi cyanaana. “Kanwena bamanye ne Ndi ne cya kwikala mudifile ku maalu a Taatù Wanyi anyi?”

⁸³ Nukaavwaku bamone paakateeciibwa Yesu kudi Sataana anyi? Ngiikadilu Wende mwaba awu, pavwaYe usanganyiibwa mu diteeciibwa Dyende adi apu, cyakamanyisha ne Yèyè uvwa

Nzambi, bwalu Yêyè wakashaala ne Dîyì. Nwamonu anyi? “Baakafunda ne,” mwakamba Sataana.

Yesu ne: “Baakafunda kabidi ne,” mushaale anu ne Dîyì.

⁸⁴ “Nzambi, mu bikondo bya kale,” mutwabadi kaaba aka. “Nzambi, mu bikondo bya kale,” mbwena kwamba ne bikondo bya kalekale, “mu mishindu mishiileshiilangane,” mishindu yâbûngì, “wakaDimanyisha kudi baprofeta Bende ku bikeena-kumona.” Aci ncivwa ngiikadilu wa muprofeta, mpavwaye udyanjila kwamba maalu ne ôwò enzeka. Mpindyewu aci ki civwa ngiikadilu wende wa dimanyishiibwa dyende, dya ne Nzambi uvwa nende. Pashiishe aci civwa cimupa bukenji bwa kuumvwija Dîyì bwa dituku adi, bwalu: “Dîyì dya Nzambi dudi dilwa kudi baprofeta,” ngiikadilu wa muprofeta, uvwaYe udyanjila kwamba.

⁸⁵ Bible mmwambe ne: “Kwôkò kwikale wa nanku awu, ne cidiye wamba ciikale cyenzeka, pa dîbà adi numuteelejaayi; kadi, cyôci kacyi cyenzeka to, kanumwitabuujì to, kanumuciinyi to, kadi Dyanyi. . . piikala—piikala Dîyì Dyanyi kadiyi munda mwende. Kadi cyôci cyenzeke bulelela, pa dîbà adi Dîyì Dyanyi didi munda mwende.” Ki dimanyishiibwa dyende ndyôdì adi. Ki ngiikadilu wa muprofeta nyêyè awu.

⁸⁶ Mpindyewu, Nzambi, mu bikondo bya kale, mushindu awu nguvwaYe uleeja ngiikadilu ya didimanyisha dya Yêyè mwine kudi muntu, mu kwakwila kudi muntu uvwa mubiikidiibwe bwa kwikala muprofeta. Mpindyewu, Bible udi wamba ne: “Nzambi, mu bikondo bya kale, mu mishindu mishiileshiilangane, wakaakwila ne baataatu kudi baprofeta.”

⁸⁷ Tudi tubala kabidi, mu Peetelo Mwibidì ne, Dîyì dya Nzambi dyônsò mu kaabujima dyakafundiibwa kudi bôbò abu. “Bantu baa kale, basakiibwe kudi Nyuma Mwîmpè, baakafunda Bible.” Bavwa mbaprofeta. Dîyì divwa dilwa kudibo ne bôbò baDifunda, baDifunda, ku disonsodiibwa. Bavwa banji kumanyishiibwa dyambedi ne mbaprofeta, pashiishe bavwa—bavwa bafunda Dîyì dya disonsodiibwa adi, ne abu’ bavwa ne dyumvwija dya dibuulula dya kudi Nzambi bwalu civwa n’Nzambi munda mwa muntu awu.

⁸⁸ Mpindyewu mushindu awu nguvwaYe uDileeja mu ngiikadilu Yende ya dimanyishiibwa, bikeena-kumona byabo biikale bishindikiibwe, ki civwa ngiikadilu wa Nzambi munda mwabo, mwikale uDimanyisha kudi bantu.

⁸⁹ Mpindyewu, mushindu awu ki umwepele uvwaYe munda mwa Kilisto. Muprofeta yêyè uvwa anu katoba kakese cyanaana. Kilisto uvwa kaabujima kaa Nzambi. Ne Nzambi uvwa munda mwa Kilisto, mwikale ùpungisha baa pa buloba ne Yêyè mwine. Ne ngiikadilu Yende yivwa yimanyisha ne n’Yêyè, civwaYe aci, mu mushindu wa Yêyè wamba ne: “Piikalabi ne Ncyênà ngenza byenzedi bya Taatù Wanyi to, pa dîbà adi kanùcîtâbuujì to.

Piikalabi ne Ncyêna ne ngiikadilu wa Taatù Wanyi to, pa dîbà adi kanuNgiitabuuji to, kanwitabuuji mèyi Aanyi to. Piikalabi ne Ncyêna ne ngiikadilu wa Taatù Wanyi munda Mwanyi to, pa dîbà adi kanùcitàbùùji to, nansha kakese.”

⁹⁰ Mpindyewu, ngiikadilu Yende kayitu yishintulukaku to. Nzambi kèna mwa kushintululaku ngiikadilu Wende to, anu mudibi ne—mudibi ne mwânà—mwânà wa mukooko kèna mwa kushintulula ngiikadilu wende to, anyi cintu cikwabo kana cyônsò eci kaciyi mwa kushintulula ngiikadilu yaci to. Bwalu, pacidici anu mwaci mwa ku muji amu, cidi anu cya ku muji. Nenuku wèwè mushintulule cintu kampanda, pa dîbà adi udi mucishintulule mucyùmùshe kwaci kwa ku muji.

⁹¹ Mbyenze anu mùdi mwa kwangata ngulube, ne mwikale mwa kwowesha ngulube màyi ne—ne kulaaba mukubu awu pa nzadi ya ku bânà bende baa nkàsà, mùtù bakaji benza amu, ne kumulongolola ne kàpèntà kaa ku mishiku, kadi kumuvwadika nkanzu wa mwîmpè awu. Lekelelaaku anu ngulube wa kale awu, s'ùyaaya mutangile buludi mu bitoci, ne kudivwandamu cyakabidi. Bwa cinyi? Yèyè nngulube, kwajiki. Kadi, nenuku, kadi, nudi bamanye's, kwèna mufwanyineku kwenza . . .

⁹² Mwânà wa mukooko kî mmufwanyine kwenza nanku to. Kaakukabwelaku nansha mu biine bitoci abi to. Yèyè kèna naabi bwalu to. Ki yende ngiikadilu nyôyi ayi. Nwamonu anyi? Udi mufwanyine kumuvwadika bilambà bya mushindu umweumwe awu, kadi ncyà bushuwa ne kaakuya to, ncyà bushuwa ne kaakuya to. Cya pamutupamutu aci kî nciidi ne bwalu to; cidi munda ki cyôci cidi ne bwalu. Mpindyewu, bu mudibi ne Nzambi ki mfuky'a mukele wa mwoyi wônsò ewu . . .

⁹³ Kanupangi kuumvwa eci to. Ndi nteeta, ne byônsò bidi munda mwanyi, bwa kunufikisha ku dimona cintu kampanda. Nwamonu anyi? Mbwa dyakalenga dyenu, nwênù balunda baanyi. Mbwa di—dinukwacisha. Nwamonu anyi?

⁹⁴ Ncyêna mulwe mwaba ewu anu bwa kummonabo to. Ncyêna mulwe mwaba ewu, ne mbwalu kakuvwa mûngà mwaba wa mêmè kuya to. Ndi mulwe mwaba ewu mbwalu mvwa mudyûmvwè bwa kulwa mwaba ewu. Mvwa mudyûmvwè ne mudimu wa bwambi udi Mukalenge mumpeeshe udi ne cya kuleejiiibwa munkaci mwa bantu badi apa aba, ne ndi nteeta bwa kunufikisha ku dimona cidi Nzambi bulelela mpindyewu. Yèyè udi Dîyi Dyende dilaya. Yèyè utu misangu yônsò anu Dîyi, ne Ûtu uDimanyishila ku ngiikadilu utuYe mulaye. Ngiikadilu kampanda uvwa mwa kujuuka mu cikondo kampanda, mwikale mu Dîyi, pa dîbà adi ngiikadilu wa mwine muntu udi ne cya kujuuka ewu udi umanyisha ne ki yèyè muntu awu.

⁹⁵ Ki bwa cinyi bivwa bikengela bwa Yesu kwikalaye Yèyè uvwaYe awu. Bivwa bikengela bwa kwikalabo bacimone. Kabyena bikemesha muvwabo bampofu to. Cintu . . . Mbambe

ne, nansha mwakenzaYe bishima bûngi cyanaana amu, kadi kabavwa anu mwa kwitabuuja to, bwalu Yeshaayi wakamba ne: “Badi ne mèsù kadi kabayi mwa kumona to, ne maci kadi kabayi mwa kuumvwa to.” Nwamonu anyi? Cikondo cyònsò, kî ng’anu Cyende cikondo to; kadi cikondo ne cikondo, mu mushindu wa ne: “Nzambi, mu bikondo bya kale, mu mishindu mishiileshiilangane,” kadi kabavwa anu mwa kucyumvwa to.

⁹⁶ Mpindyewu, ngiikadilu Wende katu upangilaku to. Ûtu yêye anu umweumwe awu. Mpindyewu, vulukaayi ne, ngiikadilu Wende, ngiikadilu wa Nzambi, kêna mwa kupangilaku to. Yêye mupangile, nanku’s Nzambi wapangidi. Kadi Bible mmwabele, mu Ebelu 13.8, ne: “Yesu Kilisto udi umwèumwè awu makeelela, leelu, too ne kashidi.” Ki bwa cinyi, Yêye udi Nzambi utu kayi ushintuluka to. Ngiikadilu yònsò uvwaYe ku cibangidilu awu, Yêye udi anu ngiikadilu umwèumwè awu. Mushindu wònsò wakakwataYe mudimu awu, dîbà dyònsò didiYe mwenzeku cintu kampanda adi, Ûdi ucyenza mushindu umweumwe awu musangu wònsò. Yêye kayi ucyenza to, ngiikadilu Wende washintuluku, nwamonu’s, ne ngiikadilu Yende mmifwanyine kuleeja patooke cintu kampanda civwa kacyi cya Nzambi to. Nwamonu anyi? Pa nanku katwena bafwanyine kumanya ne mpenyi. . .

⁹⁷ Byenze bu mwakamba Pòlò ne: “Piikala mpungi upatula mwadi mulubidile, wâmanya mwa kudilongolola ku mvita ki nganyi, piikala mpungi upatula mwadi mulubidile?” Mpindyewu piikala mpungi ne cya kupatula mwadi wa ne “alukilaayi cyanyima,” ki cidi cikengela twètù kwenza ncyôci aci, kwalukila cyanyima. Piikala mpungi upatula mwadi wa ne “bundulanganaayi,” ki cidi cikengela twètù kwenza, ncyôci aci, nkubundulangana. Kadi Mpungi ncinyi? N’Diyì dya Nzambi. Dyôdi ki didi dimanyisha Nzambi, nansha byòbì ne—nansha byòbì ne “bàndaayi, sòmbaayi panshi, alukilaayi cyanyima, ungwijaayi bingoma babitangije mbungu yabi ayi muulu,” nansha ciikale cinganyi. Mmwadi wa Mpungi wa Nzambi.

⁹⁸ Kadi mwadi mulubidile, padi Bible wamba ne cintu kampanda cidi ne cya kwenzeka; muntu wamba ne: “Kaa, aci’s civwa ncyà dituku dikwabo, aci nanku.” Pa dîbà adi kudi mwadi mulubidile mwab’awu. Pa dîbà adi kanwena numanya ne cya dyenza ncinyi to.

⁹⁹ Yesu wakamba ne: “Mémè ndi ne bukole bwa kuteeka mwoyi Wanyi panshi ne kuwujuula cyakabidi.” Kakwena mwadi mulubidile mwaba awu to.

¹⁰⁰ Mukaji awu wakamba ne: “Twètù tudi bamanye ne Maasiya ùlwalwa; ne paalwaYe, Yêye neàtwâmbilè bintu bya bwena byakenzaYe abi.”

¹⁰¹ Yêye kwamba ne: “Ndi Yêye awu.” Kakwena mwadi mulubidile mwaba awu to. “Ndi Yêye awu.” Uh-huh! Amen.

Baakamba ne: “Baataatu beetu baakadya manà mu cipeela.”

¹⁰² Yèyè ne: “Bòbò abu, muntu ne muntu, s’mbafwe.” Yèyè ne: “Kadi Mémè ndi Dyâmpà dya Mwoyi difumine kudi Nzambi mu Dyulu.” Mwadi mulubidile nansha umwe. “Mémè ndi Muci wa Mwoyi, wa mu budimi bwa Edena.” Mwadi mulubidile pa abu bwalu nansha umwe, nansha umwe. Ncya bushuwa ne kawenaku to. Kantu kalubidile nansha kamwe pa bwalu abu. Yèyè uvwa mutwishiibwe mu byònsò bivwaYe wenza.

¹⁰³ Bible katu ufila mwadi mulubidile to. Ùdi umanyisha ngiikadilu wa Nzambi mu mwadi udiye upatula awu.

¹⁰⁴ Yesu wakamba, mu Yone Munsantu 10.37 ne: “Piikalabi ne Ncyèna ngenza byenzedi bya Taatù Wanyi to, cìdì...ne Mémè nciyi ne ngiikadilu wa Taatù Wanyi awu to, pa dîbà adi kanuNgiitabuuji to. Byôbi abi, Byôbi mbidi bimanyisha ngiikadilu Wende munda Mwanyi, ngiikadilu Yende Yèyè.”

¹⁰⁵ Bwalu, Taatù udi Dîyì: “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi,” ne ngiikadilu wa Nzambi mmuleejiibwe patooke ku mulayi Wende bwa cikondo aci.

¹⁰⁶ Mpindyewu bu ne Yèyè uvwa ne mwoyi mu cikondo cya Mòsà, nunku kî mbikumbane to. Ne bu ne Mòsà uvwa ne mwoyi mu cikondo Cyende aci, nunku kî mbikumbane to. Bu ne Yèyè uvwa ne mwoyi mu cikondo cya Noa, nunku kî mbikumbane to, anyi bu ne Noa uvwa ne mwoyi mu cikondo Cyende aci. Noa uvwa wamba ciprofeta cya bintu bya cikondo aci, ne ngiikadilu wende ne byakenzaye byakamumanyishila ku Dîyì dya Nzambi. Mòsà wakenza cintu cimwecimwe aci.

¹⁰⁷ Nenku ki Yesu ulwâlwa ewu, ne Dîyì divwa dilayiibwe bwa cikondo aci dyakamanyishiibwa mu Yesu Kilisto ku ngiikadilu wa Dîyì, dîdì diikale Nzambi. Amen.

¹⁰⁸ Dipongolodiibwa dya Nyuma Mwîmpè, mu matuku a ndekeelu, pambidi paa bantu baa patupu aba, s’ndimanyishe ngiikadilu wa Nzambi ku bantu. Yèyè ngwâkacilayà. N’Dîyì. Yèyè wakamba ne Neàcyènzè. Muntu nansha umwe kèna mwa kucyumusha nansha. Yèyè wakamba ne Neàcyènzè.

¹⁰⁹ Pa nanku bintu byònsò byakalayaYe ebi, s’ki bidiYe wenza. S’bidi bimanyisha ngiikadilu Wende. Eyowa’s, mukalenge. “Kanùbitàbùùji to, kanwitabuuji mèyi àNdi ngamba to, piikala ngiikadilu Wanyi kayi yèyè wa Nzambi awu.”

¹¹⁰ Mpindyewu monaayi mu Yone 14.12: “Ewu udi ungiitabuuja Mémè,” mwakambaYe, “udi ne dimanyishiibwa Dyanyi, ngiikadilu Wanyi. Ewu udi ungiitabuuja Mémè, byenzedi bìndì Mémè ngenza yèyè neàbyènzè pende.” Aci’s nciidi cimanyisha ne ngiikadilu wa Kilisto udi mu yèyè awu, ciikale cileeja patooke ngiikadilu Yende Yèyè. Amen.

111 Ngădyŭmvù butendeleedi bwambwedi mpindyewu be, nansha mudi dîyi dimpate emu. Eyowa's, mukalenge. Kaa, ekelekele! Nwamonu's, kakwena ntupakanyi nansha mikese to pa Cyôci aci! Mwoyi Wende! "Ewu udi ungiitabuuja Mêmè, byenzedi bîndi Mêmè ngenza yêyè neabyênzè pende." Nwamonu's, aci cidi cimanyisha ngiikadilu awu.

112 Cintu cimwecimwe cyakambaYe ne: "Piikala ngiikadilu Wanyi kayi ummanyisha Mêmè mwine to," Nzambi munda—munda Mwende, pa dîbà adi Yêyè...kanuMwitabuuji to. Mpindyewu, Yêyè wakamba kabidi ne Yêyè neamanyishiibwe mu cyôci aci. Pa dîbà adi, aci, cyôci kaciyi ciMumanyisha Yêyè to, nanku Yêyè kêna cidiYe wamba aci to.

113 Nenku, leelu ewu, piikala Kilisto kayi uDimanyisha to, ngiikadilu wa Kilisto mwikale utumanyishisha ne tudi bàà Kilisto, biikale twitabuuja Dîyi. . . Yesu uvwa Dîyi, pa nanku bivwa bikengela kwitabuujaYe Dîyi. Nenku mmunyi mutudi mwa kwamba ne tudi bàà Kilisto, kadi tuvila Dîyi kana dyônsò dya mu Bible awu? Nyuma Mwîmpè wa Kilisto udi n'Nzambi munda mwebe, ne Yêyè neatwe "Amen" ku mulayi wônsò. Bible mmwambe ne: "Bimanyinu ebi nebifile badi biitabuuja." Nyuma wa Nzambi mmwambe ne: "Amen." Nwamonu anyi?

114 Umwe wabo kêna wamba ne: "To, aci civwa mbwa cikondo cikwabo; aci civwa anu bwa bayiidi nkaayaabo" to.

115 "Ndaayi pa buloba bujima nukayiishe Evanjeeliyo kudi cifukiibwa cyônsò. Ewu yônsò, mwaba kana wônsò pa buloba, udi witabuuja awu, bimanyinu ebi nebimufile, cintu cimwecimwe aci." "Umwèumwè awu makeelela, leelu, too ne kashidi," ngiikadilu munkaci mwa kumanyishiibwa.

116 Aci cidi cyenza Ebelu 1.1 ne: "Nzambi mu bikondo bya kale, wakwila ne baataatu kudi baprofeta," umanyisha Kilisto, mubiishiibwe ku lufu leelu ewu, ku ngiikadilu umwèumwè wâkenzaYe mu bikondo bya kale awu. Nukaavwaku bamone anyi? Nzambi katu ushintululaku mushindu Wende to.

117 Mu Bible wa kale, pavwa mulooci uloota ciloota, ne kakuyi muprofeta mu ditunga amu bwa kumona ne ciloota aci ncyà bushuwa anyi ncyà mafi, bavwa ne mushindu mukwabo wa kujandula. Bavwa bangata ngiikadilu awu, uvwa muloote ciloota awu nansha yêyè mwikale nganyi, baya nende too ne ku ntempelu. Cibwikilu cya pa cyâdi cya Aalona aci, yêyè uvwa mwakwidi munene awu, civwa cikùdika ku dikunji. Nenku mulooci ewu uvwa wawula ciloota aci. Nansha cyôci cyumvwika cilenga mushindu kaayi, nansha cyumvwika cilelela mushindu kaayi; kwôkò kakuyi Bukênkè bwa butambe mfukilu bukelebuke pa mabwe awu to, cidi cibiikidiibwa ne ng'Ulimà Tuumimà aci (Babadi baa Bible badi bumvwa); pa dîbà adi, nansha ciikale cyumvwika cilelela bishi, kacivwa nanku to. Mushindu wa pabwawu wa Nzambi, ngiikadilu wa Nzambi,

bivwa ne cya kuleeja patooke ngiikadilu Yende mu citambe-mfukilu aci, bwa kuleeja ne Yèyè uvwa muDimanyishe pa mukenji awu. Amen.

¹¹⁸ Ndi ngamba cintu cimwecimwe eci diloolo edi. Ulimà Tuumimà wa kale awu wakamana kuya, kadi Dìyi dicidi anu cintu cidi cimanyisha ngiikadilu wa Nzambi, mulayi wa dībà ditudi ne mwoyi. Ki ngiikadilu ya Nzambi nyôyi ayi mimanyishiibwe kudi mulayi wa dībà ditudi ne mwoyi.

¹¹⁹ Aci cidi civwija Nzambi umwèumwè awu bu mwakadiYe. “Mu bikondo bya kale,” tangilaayaaku, “mu mishindu mishiileshiilangane, Yèyè wakaakwila ne baataatu kudi baprofeta.” “Ne mikenji ya Mòsà ne baprofeta byakadiku too ne ku Yone; kubangila anu apu, Bukalenge bwa mu Dyulu.” Monaayi: “Kadi mu dituku dya ndekeelu edi,” mwikale wamba cintu cimwecimwe cyakambaYe musangu awu aci, “ku Mwânà Wende Kilisto Yesu.” “Nzambi, mu bikondo bya kale, mu mishindu mishiileshiilangane, wakaakwila ne baataatù kudi baprofeta; mu dituku dya ndekeelu edi,” mwikale wenza cintu cimwecimwe eci, “wakwila ne bantu (baataatù) kudi Mwânà Wende Kilisto Yesu.” MmuMubiishe ku bafwe, ne Yèyè udi ne mwoyi munkaci mwetu, uDimanyisha ne udyanjila kutwambila maalu kumpala kwa dībà, bwa ne Yèyè udi mujinguludi wa meeji ne mapangadika a mu mwoyi. Yesu Kilisto umwèumwè awu makeelela, leelu, too ne kashidi! “Nzambi, mu bikondo bya kale ne mu mishindu mishiileshiilangane, wakaakwila ne baataatù kudi baprofeta, kadi mu dituku dya ndekeelu edi kudi Mwânà Wende Kilisto Yesu.” Mifundu kayituku ya kunaya naayi to. Mmwômò menemene.

¹²⁰ Bu mûnkaavwà mwambe kumpala, Nzambi katu dijinga ne muntu bwa kuumvwija Dìyi edi to. Ùdi uDyumvwijila Dìyi Dyende. PadiYe wamba cintu kampana, cyenzeka, ki dyumvwija ndyôdi adi. Nwamonu anyi? Katu dijinga ne muntu bwa kwambaye ne: “Ee, mémè ndi ngiitabuuja ne cidi ciswa kwamba *cikampanda*” to. Nzambi utu ucimanyishila ku dyumvwija Dyende Yèyè mwine.

¹²¹ Ùdi, piikalabi ne mulayi ngwa dituku adi, twètù katwena mwa kwikala ne mwoyi mu bukênkè bwa—bwa—bwa Luther nansha, katwena mwa kwikala ne mwoyi mu bukênkè bwa Wesley to, katwena mwa kwikala ne mwoyi mu bukênkè bwa nî nganyi nî nganyi wa ku bôbò abu to. Bikengela twètù twikale ne mwoyi mu Bukênkè budi bulayiibwe bwa dituku edi.

¹²² Kadi bu ne Mòsà wakaya mu Ejipitu, ne kwamba ne: “Ee, netwibake bwâtù bunene. Netupatuke mu ditunga edi baleleme pa mâyi. Musulu wa Nil newubande?” Bavwa mwa kwikala bakakenkete mu mukanda muvunga; kamwena mulayi nansha umwe wa cyôci aci to. Ncya bushuwa. Kadi, nudi numona’s, yèyè wakadimanyisha bu muprofeta wa Nzambi, bwalu civwaye

mwambe cyakenzeka, pa dîbà adi baakamanya ne ùvwa ne Dîyi dya Mukalenge. Pâlò yêyè uvwa ne mafuma, kadi Mòsà uvwa ne Dîyi. Pa nanku mbenze anu bafika ku mbû, mafuma ônsò awu nzwing mwinshi mwa mbû; ki Mòsà kusabwisha Izaleela mbû awu, benda bendela pa buloba bûme, bwalu yêyè uvwa ne Dîyi, ne yêyè nguvwa Dîyi dya dîbà adi. Mòsà nguvwa Dîyi dimweneshiibwe bwa dîbà adi.

Eliya uvwa Dîyi dimweneshiibwe bwa dîbà adi.

¹²³ Kilisto udi Dîyi dimweneshiibwe, ne milayi yakenzaYe. “Mu katanci kakese emu baa pa buloba kabaakuMmona kabidi to; kadi nwênù nenuMmone, bwalu Nêngiikalè neenu, munda mwenu mene, too ne kunshiikidilu kwa buloba. Byenzedi bindi Mêmè ngenza nenûbyênzè peenu.” Yêyè ngwâkalaya bintu ebi. Ncinyi ciine aci? Nngiikadilu wa Nzambi mwikale uleeja patooke Dîyi Dyende, bu mwakenzaYe mu bikondo byônsò.

¹²⁴ Maalaki 4, Yêyè mmwambe ne: “Kumpala kwa dituku dinene ne didi dikwacisha bwôwà dya Mukalenge kulwadi, tangilaayi, Ndi nnutumina Eliya muprofta; ne yêyè nealujulwile bânà diitabuuja dya baataatù, kumpala kwa dituku adi kulwadi.” Yêyè ngwâkacilaya.

¹²⁵ Yesu mmwambe, mu nshapita wa 17 wa Luuka Munsantu ne: “Anu mwakadibi mu matuku a Sodoma, ki mwikalabi kabidi ku dilwa dya Mwânà wa muntu, piikala Mwânà wa muntu munkaci mwa kubuuludiibwa.” Piikala dibuulula munkaci mwa kuvunguluka, mu matuku ikala buloba bufwanangane ne Sodoma, neciikale cinyi? Nngiikadilu wa Mufundu awu munkaci mwa kuula. Nzambi uDimanyishila ku ngiikadilu Wende, ngiikadilu utuYe mwikale misangu yônsò awu. Yêyè kèna mwa kulekelaku aci to.

¹²⁶ Mu matuku a ndekeelu, Yêyè mmudimanyishile kudi Mwânà Wende. Monaayi mudi Nzambi wenza biine ebi misangu yônsò anu ku...padiYe misangu yôns-...Yêyè katu ushintululaku mushindu Wende nansha.

¹²⁷ Bantu basatu bààkaakulà ne Abraham aba, bu mutuvwa tubwamba mwaba awu, mu matuku a Sodoma.

¹²⁸ Abraham uvwa mmuntu uvwa witabuuja Nzambi. Ûvwa mukwacile Nzambi ku mulayi Wende. Sarah, mukajende, uvwa ne bidimu makumi asambombo ne bitaanu, Abraham uvwa naabi makumi mwandamutekete ne bitaanu, paakamubiikila Nzambi apu. KwambaYe ne nebapete mwâ—mwânà; Abraham uvwa upetela mwânà kudi Sarah. Mbifwanyine kumweka ndambu bicimbè, kadi mêmè ndi ndifwanyikijila ne ùkaavwa ne tu—tunshesheete twônsò tukese twa mwânà atu ne mpengele, ne bikwabo byônsò, bimana kulongolola, bwalu bavwa ne cya kupeta mwine mwânà ewu.

¹²⁹ Paanyima paa matuku makumi abidi ne mwandamukulu a kumpala awu, mona’s, Abraham uvwa mufwanyine kwikala

mwambile Sarah ne: “Udi udyumvwaku bishi, munanga wanyi?”

“Kî mbishiilanganeku to.”

“Butumbi kudi Nzambi, netumupete, nansha bishi.”

“Wâmanyi bishi?”

“Nzambi ngudi mwambe nanku.”

Cidimu ntwing. “Udi udyumvwaku bishi, munanga wanyi?”

“Kî mbishiilanganeku to.”

“Netumupete, nansha bishi. Nzambi ngudi mwambe nanku.”

Bidimu bitaanu ntwing. “Bwa mpindyewu ukaadi udyumvwaku bishi, munanga wanyi?”

“Kî mbishiilanganeku to.”

“Netumupete, nansha bishi. Nzambi ngudi mwambe nanku.”

¹³⁰ Civwa ncinyi aci? Yêyè uvwa ne mulayi wa Nzambi. Ûvwa mwitabuuje Nzambi, ne ùvwa wenza maalu bu Nzambi: wakashaala anu kacya wakwata ku Dìyì dilaya. Divwa . . .

¹³¹ Bidimu makumi abidi ne bitaanu kupitabi. Tunshesheete twine tukaavwa tushaale twenze kalaabi, kadi yêyè uvwa anu kacya watulama. Mpindyewu ukaadiye mununu, ne mubidi mukobame, ne mwikale mu mmwenekelu wa wenza ne bwôwà ewu; ne munda mwa Sarah mwikale mene anu mumane kufwa, ne yêyè mwikale nkumba. Kadi mmu ngiikadilu kaayi mudibo’s we!

¹³² “Udi udyumvwa bishi, Abraham, taatù wa bisamba?” muvwa balunda bende beena kwitabuuja baa budingìbudingì abu bafwanyine kumwambila’s.

¹³³ “Ee, butumbi kudi Nzambi, ndi ndyumvwa bilenga. Netupete mwânà awu, nansha bishi.” Bwalu yêyè kaakatenkakanaku ku mulayi wa Nzambi ku bupidya to; kadi ùvwa ne dikanda, mwikale upa Nzambi butumbi, bwalu ùvwa nutwishiibwe anu menemene ne civwa Nzambi mwambe, Nzambi uvwa ne bukole bwa kucyenza. Amen. Ki ngiikadilu wa mwena kwitabuuja nyêyè awu.

¹³⁴ Kadi wêwè? Nwamonu anyi? Kadi twêtù, bânà baa Abraham aba? Tudiku bafwanyikijiibwe ne Dìyì dya Nzambi, bu mulayi, ne ngiikadilu wetu mwikale utumanyishisha twêtù biine, ne tudi tuDìitabuuja bulelela anyi? Anyi, udi wêwè anu welakana bwa kwangata dipangadika, watupika kuumuka *apa*, wâya lwà kuulu *eku*, wâya lwà kwinsi *eku*, wabùka, wâtwa eku wâtwa eku ne wêlakana bwa kwangata dipangadika, pa bidi bitangila Cyôci aci? Dîbà adi, katwena beena Kilisto to, tudi anu tudingidija bu badi biitabuuja.

135 Kadi, patudi bulelela twimanyina mulayi awu, kuWukoka anu mwaba awu kadi kushaala naaWu! Abraham wakacyenza.

136 Mpindyewu tudi tusangana ne, dîngà dituku kumonaye bantu basatu balwa, benda lwa makàsà. Bible mmwambe mwaba ewu ne: “Divwa dîbà cibangabanga,” divwa ne cya kwikala pabwîpî ne nkankala. Bantu aba kulwabo ne pavwaye apu ne bakaavwa bayiikila nende. Tudi tuumvwa ne babidi baa kudibo baakapweka ku Sodoma. Ngeela meeji ne tuvwa baakulepu diloolo adi. Umwe wa kudibo wakashaala nende.

137 Tangilaayi Muntu ewu wâkabiikilâye ne...wâkashâàla nende awu, cyâkenzà Muntu awu. Umwe ki wâkamanyikila ku ngiikadilu Wende ne, Yèyè ki uvwa Elohim.

138 Elohim, mwaku wa nzànzànà mu Bible ne: “Ku cibangidilu, Nzambi . . .” Mpindyewu, yònsò wa kunudi nwènù bamanyi baa mabâla aba mmumanye ne mwaku awu *Nzambi* mwaba awu udi uswa kwamba, mu cyena Ebelu, udi “Elohim,” mwikale uswa kwamba ne, “wa Bukole bwònsò, udi udikumbanyina mu byònsò, udiku ku yèyè mwine,” kayi dijinga dya dikwacisha dya kudi muntu kampana nansha umwe to, kayi dijinga dya dyumvwija dya kudi muntu kampana nansha umwe to; udyenzela Dyende Yèyè mwine. Yèyè udi Nzambi udi udikumbanyina mu byònsò, udi myaba yònsò, mumanye byònsò, wa ngulu yònsò. Yèyè udi Nzambi.

139 Ki Yèyè awu. Nunku Abraham mpindyewu, nkambwa uvwa mukwate ku Dîyî ewu, kutapaye dîsù kudi Mwabilaayi ewu. Kadi paakeela Mwabilaayi ewu nyima ku ntenta, Wakamba ne: “Mukajebe Sarah, udi penyi?”

Yèyè ne: “Ûdi mu ntenta, paanyima Peebe apu.”

140 Yèyè ne: “Nènnùmwenèkèlè bilondeshile cikondo cya mwoyi, nunku nenupete mwânà ûmvwà Mémè munulaye ewu.”

141 Ki Sarah kusekaye ciine aci. Ki Yèyè uvwa wakula nende awu, kumwambila civwa Sarah mwambe mu ntenta, paanyima Pende.

142 Mpindyewu, mu Genese, nenubale cyôci aci. Tudi tusangana pa dîbà adi ne, Abraham, paanyima paa Muntu ewu mumane kuDimanyisha . . .

143 Civwa ncinyi? Ebelu, nshapita mwi4, mvensa wa 12, mmwambe ne: “Dîyî dya Nzambi nditwe, ne bukole kutamba mwele wa mvita wa nseke ibidi, dijinguludi dya meeji ne mapangadika a mu mwoyi.”

144 Yèyè wakamanya ne ki mwine Muntu awu. Ûvwa mumanye ne kakuvwa bapofeta pa buloba pa kuumusha yèyè, ki bwa cinyi Dîyî dya Mukalenge divwa dilwe kudiye yèyè. Ne yèyè ki uvwa muprofeta, nunku’s ki Dîyî ndyôdi edi dilwe kudi muprofeta.

145 Cintu cimwecimwe ne Yone Mubatiiji. Kakuvwa muprofeta to kukaavwa bidimu nkama inaayi. Ndi mvuluka . . .

146 Pàmwāpa mukulumpe Docteur Davis mmusòmbe kaaba aka, diloolo edi, muyiishi wa kale wa ba-Baptistes Missionnaires uvwa mumbatiize mémè mu Diitabuuja awu. Ûvwa ne ciibidilu cya kwikala kukokangana naanyi. Wamba ne: “Billy, wèwè’s uctidi anu mwànà mpindyewu. Bikengela wikale unteeleja mémè.”

Mémè ngamba ne: “Eyo, Mwaneetu Davis, ndi muteeleje.”

147 Yèyè ne: “Udi umona’s, Yone yèyè kavwa mubatiijibwe to. Pa nanku yèyè ki uvwa ubatiizangana, kadi kayi mubatiijibwe yèyè to; kakuvwa uvwa mukumbanyine bwa kumubatiiza yèyè to.” Awu’s nteoloji mulenga wa cyena Baptiste. “Kadi ki Yesu ulwàlwa ewu, ki kwambaye pa dîbà adi ne. . . Yone kwambaye ne: ‘Bidi bikengela bwa mémè mbatijibwe kùdì Wèwè; Wèwè udi ulwa kùndì bwa cinyi?’ Ki Yèyè ne: ‘Itaba bwa biikale nanku.’” Yèyè ne: “Nenku pa dîbà adi ‘paakaMwitabilaye,’” yèyè ne, “udi umona’s, ki Yesu kubatiizaye Yone. Nenku paakatukaYe mu mâyi, pa dîbà adi mau lu kuunzulukawu ne Yèyè kumona Nzambi mu mmwenekelu wa nyuunyi wa nkuci, mwikale upweka ne ulwa pambidi Pende, wamba ne: ‘Ewu ki Mwan’Aanyi munanga, ùndì musankile bwa kusòmbela munda Mwendè.’” Kadi, to, kî mbwa kupangakangana ne Docteur Davis to, kadi yèyè uvwa mu ntupakanyi.

148 Nwamonu’s, Yone nguvwa muprofeta, ne Dîyi misangu yònsò ditu dilwa anu kudi muprofeta. Pa nanku piikalabi ne Dîyi dyakavwijibwa mubidi, bivwa bikengela kulwaDi kudi muprofeta awu, nansha bishi; bwalu, yèyè uvwa munkaci mwa kufidila Dîyi bujaadiki, nenku ngiikadilu wende mene ki wâkamumanyishilâ ku cyôci aci. Ki Dîyi dilwalwà edi, mpindyewu cyâkenzekâ ncinyi? Mmwenze anu usemena kumpala kwa Yesu, Yone kwambaye ne: “Bidi bikengela bwa mémè mbatijibwe kùdì Wèwè; Wèwè udi ulwa kùndì bwa cinyi?”

149 Yesu kwamba ne: “Itaba bwa biikale nanku, bwalu nunku mbikumbane bwa twètù (bidi ne mushinga kutudi) bwa kukumbaja bwakane bwònsò.” Yone mwikale muprofeta; Yèyè mwikale Dîyi. Yèyè uvwa Mulambu, ne Yèyè ukaavwa pabwîpî ne kubwela mu mudimu Wende wa bwambi wa pa buloba, ne bivwa bikengela bwa Mulambu kusukudiibwawu kumpala kwa kufidiibwawu. Ki Yone kuMubatiizaye, bwalu wakamanya. “Itaba bwa biikale nanku, bwalu nunku mbikumbane bwa twètù kukumbaja bwakane bwònsò.” Bivwa bikengela bwa Mulambu kusukudiibwawu kumpala kwa kufidiibwawu, ne pa nanku Yone kuMubatiizaye. Kabivwa ne Yesu ngwâkabâtiiza Yone to. Yone ngwâkabâtiiza Yesu. “Itaba bwa biikale nanku.”

150 Monaayi, ki Abraham ewu, ne yèyè uvwa ne Dîyi dya Mukalenge. Dîyi dya Mukalenge dyakalwa kudiye. Yèyè nguvwa muprofeta. Nenku mpindyewu ki Dîyi dilwalwà edi. Yèyè wakamubiikila ne: “Abraham,” kayi Abram to.

151 Ndambu wa matuku kumpala kwa cyôci aci, dîna dyende divwa Abram—divwa Abram, mpindyewu dikaadi Abraham. Mukajende uvwa Sari, mpindyewu didi “Sarah,” kayi S-a-r-r-a to; S-a-r-a-h. Kaciyi (A-b-r-a-h-a-m) A-b-r-a-m to, kadi A-b-r-a-h-a-m, Abraham.

152 Nenku Muntu ewu kuDimanyishaye, paakambaYe ne: “Abraham!” Kaa, ekelekele!

Abraham kwambaye ne: “Elohim!”

153 Diyî ndyôdi adi ne muprofeta, kaaba kamwe, ngiikadilu yônsò ibidi mimanyishiibwe.

154 Elohim, Yèyè kwamba ne: “Mukajeebe Sarah, udi penyi?”

155 Yèyè ne: “Ûdi mu ntenta, paanyima Peebe apu.” Ki. . . Pa dîbà adi cishima kwenjiibwaci. Elohim! Abraham kuMubiikila ne, “Nzambi udi udikumbanyina mu byônsò, wa Bukole bwônsò, wa ngulu yônsò.”

156 Yesu wakamba, pavwaYe pa buloba, Yèyè wakenza cintu cimwecimwe cyakenza Elohim aci. Aci nyakamanyisha ngiikadilu Wende ne n’Nzambi.

157 Ne Yèyè wakamba, kumpala ne: “Mu matuku a ndekeelu, anu ku dilwa mene dya Mwânà wa muntu, piikalaYe munkaci mwa kubuuludiibwa, mmwenekelu ewu neènzekè cyakabidi, bu mwakadiye ku Sodoma.” Elohim munkaci mwa bantu Bende, Nzambi wa Bukole bwônsò! Ki cidi Mufundu wamba ncyôci aci. Elohim munkaci mwa bantu!

158 Kukaadi bidimu makumi anaayi bidiYe utubatiiza ne Nyuma Mwîmpè, Elohim, Nzambi! Ne ekeleeziya. . .

159 Tangilaayi, Abraham wakamona cimanyinu cimwepele, dibiikila dikwabo; cimanyinu, dibiikila; dibiikila, cimanyinu; mwindile mwânà mulaya awu. Kadi cimanyinu cya ndekeelu cyakamonaye, dimweneka dya ndekeelu, dibamwenekela dya ndekeelu dya Nzambi kumpala kwa mwânà mulaya awu kumataye mu cyalu, civwa ng’Elohim mu mubidi wa buntu. Pashiishe mwânà mulaya awu kulwaye.

160 Nenku Dimiinu dya Abraham didi munkaci mwa kwindila Mwânà mulaya, Yesu Kilisto. Nenku mbamone bimanyinu, dipongolodiibwa dya Nyuma Mwîmpè, dyakula dya mu myakulu, dyondopa dya kudi Nzambi, ne bikwabo. Kadi padi Mwânà wa muntu munkaci mwa kubuuludiibwa, Elohim neapingane kudi Dimiinu dya bukalenge dya Abraham bwa kuleeja cintu cimwecimwe aci cyakaleejaYe mu dituku adi aci, amen, Elohim, anu muvwabi amu! Bwa cinyi? Neciikale ngiikadilu wa Nzambi.

161 Mpindyewu, piikalabi ne Kilisto uvwa Nzambi: “Katanci kakese aka baa pa buloba kabaakuMmona kabidi to; kadi nwênù nenuMmone, bwalu Nèngiikalè neenu, munda mwenu mene, too

ne ku dikumbana dya maalu ônsò, ku ndekeelu. Byenzedi bìndi Mèmè ngenza nenùbyènzè peenu.”

¹⁶² Yesu mmwambe aci mu—mu Luuka, nshapita wa 17. Eyo, patudi twitabuuja ne tumona matuku a ndekeelu aa, mmwenekelu ewu bikengela enjiibwe cyakabidi.

¹⁶³ Ki bwa cinyi, Ebelu 1.1: “Nzambi, mu bikondo bya kale wakaDimanyishila kudi baprofeta, mu matuku a ndekeelu aa mmumanyishe dibiishiibwa dya ku bafwe dya Mwan’Ende,” pa kupa Ekeleeziya ngiikadilu umwèumwè wákadiYe nende awu, ùvwija Ebelu 13.8 wa cya bushuwa menemene.

¹⁶⁴ Kakwena masala nansha makese adi mwa kutuudiibwa ku cyôci aci to. Awu mmasala a mukanku. Atu ashaala anu makwate ndendende, bwalu nnyuunyi ya mu dyulu. [Katupa kaa mukaba wa mêyi munda mutupu—Muf.] . . . batu bayidiisha cyakudya cya mikanku.

¹⁶⁵ Mpindyewu tudi tumona ne: “Mu bikondo bya kale, mu mishindu mishiileshiilangane, Yèyè wakaakwila ne baataatù kudi baprofeta, mu matuku a ndekeelu kudi Mwan’Ende Yesu Kilisto, pa kuMubiisha ku bafwe.” Nenku’s ki Yèyè ewu munkaci mwetu, paanyima paa bidimu binunu bibidi, Yesu umwèumwè awu, kayi umwe wa ku baprofeta to; Yesu, aleluuyah, Mwânà wa Nzambi mubiishiibwe ku lufu!

¹⁶⁶ Yesu wakamba, dituku dikwabo, Wakamba ne: “Lukongo lwa beena lwonji ne beena masandi ludi lukeba cimanyinu, ne bôbò nebapete cimanyinu.” Lukongo lwa beena lwonji ne beena masandi. Ndîbà kaayi dikaadiku baa pa buloba biikale beena lwonji, anyi beena masandi ne maalu makudimika, kupita mudibo mpindyewu?

¹⁶⁷ “Anu mwakadibi mu matuku a Yona, bu mwakadi Yona mu difu dya mushipa wa balena munda mwa matuku asatu a muunya ne a bufuku amu, Mwânà wa muntu kabidi udi ne cya kwikala mu mwoyi wa buloba matuku asatu a muunya ne a bufuku.”

¹⁶⁸ Nenku, “lukongo lwa beena lwonji ne beena masandi” luvwa ne cya kupeta cimanyinu. Cimanyinu cya mushindu kaayi? Cimanyinu cya dibiishiibwa dya ku lufu. Nenku nyewu tudi naaci leelu ewu, paanyima paa bidimu binunu bibidi, Yèyè uciidi anu ne mwoyi. Nyewu udi munkaci mwetu, diloolo edi, umwèumwè awu makeelela, leelu, too ne kashidi, mwikale udimanyishila ku ngiikadilu ya Nzambi, umwenesha Diyì dyakalayaYe bwa kwenza mu dituku edi. Amen.

¹⁶⁹ Ki Diyì ndyôdi adi. Mpindyewu nenwitabuuje cimanyinu anyi? ki cintu cidi cilondà, mu matuku a ndekeelu, dimanyishiibwa Dyende kudi Mwan’Ende. Monaayi.

¹⁷⁰ Nzambi wakaakula ne Môsà mu bikondo bya kale. Mu Dutelonoma 18.15, wakamba ne: “Mukalenge nzambi webe

neajuule Muprofeta mufwanangane naanyi.” Mpindyewu tangilaayi. Ki Dìyi ndyòdi adi. Ki Dìyi ndyòdi adi. Awu uvwa n’Nzambi. Awu kavwa Mòsà to. Mmunyi muvwa Mòsà mwa kumanya ciine aci? Yèyè’s uvwa muntu. Kadi Nzambi, wakwila kudi Mòsà, ngwákamba cyòci eci. Nudi nwitabuuja aci anyi? Eyo.

¹⁷¹ Mpindyewu monaayi Yesu, tangilaayi numone muvwa ngiikadilu Yende mimanyishe ne Dìyi dilaya edi divwa dilelela. Neya bushuwa ne ki cyakenzaYe. Yèyè wakamanyishiibwa ku ngiikadilu ewu wákamba Mòsà ne ki wíkalaYè awu.

¹⁷² Bààbûngì baabo, bu mudi leelu ewu, mbaswe kumona mulombodi kampanda wa munene. “Kaa, ewu’s ki Docteur Ph. *Kampanda* awu. Mmupatukile mu Université wa Hartford.” Anyi ne: “Mmupatukile mu cintu kampanda cya cinene mu mwaba kampanda mushindu awu.” Aci kî ndidimanyisha dya Nzambi to. To, to. Kakwena kantu nansha kamwe kaa aci to. Dìyi ki didi dimanyisha Nzambi. Nwamonu anyi?

¹⁷³ Yesu kavwa mumanyi wa dibàla to, anyi Kavwa mene mwakwidi to, anyi Kavwa mene laabi to, bwa baa pa buloba. Yèyè uvwa mmuntu mupidyè diitabuuja, bwa baa pa buloba.

¹⁷⁴ Kadi Nzambi uvwa ushindikila Dìyi Dyende mu Yèyè, civwà ciMuvwiya Emanuwele. Ki civwa dimanyishiibwa Dyende ncyòci aci. Mpindyewu, mwaba ewu, Yesu mwikale ukumbanangana ne cyòci eci anu menemene mwakamba Nzambi mu bikondo bya kale ne Yèyè neñzè, mu Mòsà, civwaYe mwa kwenza.

¹⁷⁵ Mpindyewu tangilaayi numone paakatwilanganaYe ne Peetelo, mutuvwa bacileje bu mu dinaya diloolo kampanda, paakatwilanganaYe ne Peetelo ne kwambila Peetelo ne dînà dyende nkampanda. Cimanyinu eci ki civwa cimanyisha mèyi Ende a bu-Maasiya, kudi Peetelo, bwalu Dìyi divwa dyambe ne: “Mukalenge Nzambi webe neajuule Muprofeta.”

¹⁷⁶ Ki Peetelo kuseemena, yèyè uvwa Simona mwine musangu awu, kuseemenaye kuvwaYe aku. Ki Yesu kumutangila, kwamba ne: “Dînà dyebe n’Simona, ne udi mwânà wa Yona.” Aci cyakamanyisha ngiikadilu wa Kilisto ne ki Dìyi dyakalaya Mòsà adi. Peetelo wakajingulula ne cimanyinu aci civwa cimanyisha Yesu bu Maasiya. “Nzambi uvwa munda mwa Kilisto,” dilaabiibwa bwa matuku a ndekeelu. Bwa Natanaela... Vulukaayi ne, Yèyè wakambila Simona dînà dyende.

¹⁷⁷ Mpindyewu, tangilaayi, kudi Natanaela Yèyè wakamwambila civwaye mwenze. “Wèwè uvwa mwinshi mwa mucì pâmvwà mukumone apu.” Aci cyakaMumanyishisha bu Maasiya.

¹⁷⁸ Kwambaye ne: “Wèwè udi Mwânà wa Nzambi. Udi Mfumu wa Izaleela.” Yèyè wakamanyishiibwa ku ngiikadilu wa Dìyi dilaya dya ne Yèyè uvwa ne cya kwikala Maasiya. “Mukalenge Nzambi webe neajuule Muprofeta.”

179 Mukaji mutekete wa ku ciina cya mâyi awu, Wakamwambila civwaye, ne aci cyakaMumumanyishisha bu Maasiya mulaya ewu. Nwamonu anyi?

180 Ngiikadilu Wende, ngiikadilu Yende, yivwa n'Diyi dimanyishiibwe. Yivwa nngiikadilu Yende yivwà yileejà ne Dìyì divwa Nzambi, pa nanku civwa Nzambi mumanyishiibwe mu Kilisto. Mpindyewu citangilaayaaku. Fundaayi nulame.

181 Kudi Peetelo, Yèyè wakamanyishiibwa kudi Peetelo pa kumwambila dîna dyende. Wakamanyishiibwa kudi Natanaela pa kumwambila cyakenzaye. Wakamanyishiibwa kudi mukaji awu, pa kumwambila civwaye. Civwaye...ne *yèyè* uvwa nganyi; civwaye *yèyè* mwenze; ne civwaye *yèyè*. Wakamanyisha ngiikadilu Wende wa bu-Maasiya, aci civwa ne cya kwikala ngiikadilu wa Maasiya.

182 Tangilaayi numone mudi mukaji mutekete awu wamba cintu cimwecimwe aci. “Mukalenge, ndi njingulula ne Wèwè udi muprofeta. Katwena bapete muprofeta nansha umwe to kukaadi nkama ya bidimu. Tudi bapete bwena ekeleeziya ku bûngi bwabu, makokyanganyi ne tuumaalu tudi tutapululangana twa cyena mangumba ku bûngi bwatu, kadi katwena bapete muprofeta nansha umwe to kukaadi nkama ya bidimu. Tudi bamanye ne paalwa Maasiya, cyôci eci ki cyaMumanyisha.”

183 Yèyè ne: “Ndi Yèyè awu, udi wakula neebe ewu.” Kakwena cintu nansha cimwe cya cilubidile pa bwalu abu to: “Ndi Yèyè awu.” Aci cyakaMumanyisha.

184 Mukaji wa mashi alwa munda awu, wakaMumanya bu Dìyì. Mushindu kaayi? Ku cyakenzaYe paakaMulenga diitabuuja dyende. Wakakudimuka e kwamba ne: “WâNdengì awu nganyi?” Wakamanya ne cintu kampanda civwa cyenzeke. Aci cyakamanyishisha Yesu bu Maasiya.

185 Mukaji awu wakaciitabuuja, ne wakamba ne: “Bu mêmè anu mwa kulenga civwalu Cyende, nêngûmvwè bîmpè.”

186 Nunku mmwenze anu ulenga, Yèyè kukudimuka, kwamba ne: “Mpindyewu wâNdengì awu nganyi?” Ki bônso kucivilabo. Kadi ngiikadilu Wende wa bu-Maasiya awu. . .

187 Amen! Ndi ntekemena ne nudi numona aci, nwênù disangisha. Teelejaayi, bu mutukaadi tujikija.

188 Ki yèyè wâMulengì awu. Kuvwa nkama, pâmwápa, yiteeta bwa kuMulenga. Peetelo wakaMutandisha mene, wamba ne: “Ee, bônso bwabo's badi munkaci mwa kuKulenga.”

189 Yèyè ne: “Eyo, kadi cibì muntu kampanda mmuNdenge mu mushindu mushiilangane.” Ndilenga dya dishiilangane adi, dya diitabuuja. Nwamonu anyi? Yèyè ne: “Muntu kampanda mmuNdenge. Civwa ndilenga dya dishiilangane. Ndi mupete butekete. Dikanda ndipatuke mu Mêmè. Bukole mbutatuke mu Mêmè.” Mpindyewu, ki Yèyè udi mwimane wawa.

¹⁹⁰ Mpindyewu, nansha muyiidi Wende Yèyè mwine kwamba, mu ngaakwilu mukwabo ne: “Wèwè udi umvwika—umvwika anu bu ne Udi muntu kampanda wa mupange lungenyi’s. Mona’s, bantu, bantu bônso’s badi munkaci mwa kuKulenga.”

¹⁹¹ Tangilaayi Dyende, tangilaayi Dyende dimanyishiibwa mpindyewu. Yèyè wakakudimuka, wakatangila mu musùmbà wa bateeleji awu. Yèyè wakamusunguluja anu yèyè. Kacivwa mwa kusokoma kabidi to. Wakamwambila pa bivwa bitangila disaamà dyende, ne wakamba ne: “Diitabuuja dyende dyamusangaji.”

¹⁹² Mukaji awu wakamanya, ku cyôci eci, Ebelu 4.12, ne: “Dîyi didi dijingulula meeji, mapangadika a mu mwoyi.” Ngiikadilu Wende wakaMumanyishisha bu “Dîyi dya Nzambi divwijiibwe mubidi ne disômbèle munkaci mwetu.” Amen.

¹⁹³ Ndi ngeela meeji ne cintu cimwecimwe aci diloolo edi cidi ciMumanyishisha, bu Yesu Kilisto mubiishiibwe ku lufu mwikale ne mwoyi munkaci mwetu diloolo edi, umwèumwè awu makeelela, leelu, too ne kashidi. Mpindyewu, bu mudibi ne Ebelu 13.8 mmulelela, ngiikadilu Wende neaMumanyishishe leelu ewu, bu mwakenzaye musangu awu, mushindu umweumwe awu.

¹⁹⁴ Tangilaayi Keleopa ne bakwabo, paanyima paa dibiika dya ku lufu. Yesu wakaDimanyishila ku mushindu wakacibulaYe dyâmpà adi, mwàkacyènzàYe anu menemene mushindu uvwaYe mucyènzè kumpala kwa Yèyè kupoopediibwa pa nkuruse. Ki bôbò...Aci cyakamanyishisha ngiikadilu Wende, bwalu mushindu awu ki wàkacyènzàYe.

¹⁹⁵ Mpindyewu bu ne Yèyè uvwa kaaba aka diloolo edi, Yèyè uvwa mwa kuDimanyisha mushindu kaayi? Anu mwakenzaYe makeelela amu, bwalu Yèyè udi umwèumwè awu leelu, ne neikale nanku kashidi. Ndidimanyisha adi. Ebelu 4, mwînây- . . . 14 ne 15: “Yèyè udi mpindyewu. . .” Ûdi wamba ne: “Yèyè udi Mwakwidi wetu Munene udi mwa kulengiibwa kudi dyumvwa dya mateketa etu.” Yèyè udi Mwakwidi wetu Munene mpindyewu ewu. Paanyima paa dibiishiibwa Dyende dya ku lufu, paanyima paa lufu Lwende, paanyima paa dijiikiibwa Dyende, paanyima paa dibiishiibwa Dyende dya ku lufu, paanyima paa dibanda Dyende, amen, Yèyè ucidi mushaale anu umwèumwè awu makeelela, leelu, too ne kashidi, Mwakwidi Munene udi mwa kulengiibwa kudi dyumvwa dya mateketa etu. Amen. Ki cidiYe aci, mpindyewu mene, bwa mulume yônso ne mukaji yônso kaaba aka waciitabuuja awu. Yèyè udi Mwakwidi wetu Munene, umwèumwè awu makeelela, leelu, too ne kashidi.

¹⁹⁶ Yèyè udi ne mwoyi kashidi. Nudi nwitabuuja nanku anyi? [Disangisha didi dyamba ne: “Amen.”—Muf.] Ngiikadilu Yende yidi yitungunuka anu ne kuMumanyishisha bu umwèumwè uvwaYe musangu uvwaYe ne mwoyi pa buloba awu. Yèyè ucidi anu ne mwoyi mwaba ewu, diloolo edi, mu mmwenekelu wa

Nyuma Mwîmpè. Yèyè udi ne mwoyi kashidi. Ne ngiikadilu Yende yidi yenda yiMulonda, anu mukaadiyi myenzenze misangu yônsò amu, piikalaYe uci ne mwoyi.

¹⁹⁷ Mêmè ndi ne kusakidila, diloolo edi, kwa ne: “Nzambi, mu bikondo bya kale ne mu mishindu mishiileshiilangane wakaakwila ne baataatù kudi baprofeta, mu matuku a ndekeelu aa kudi Mwan’Ende Yesu Kilisto.”

¹⁹⁸ Ekelekele, ncivwa mumanye ne ndi mwakule mutanci bule nanku to. Nkaavwa mupwe mwoyi ne bivwa nanku awu. Mfwilaayiku luse. Nêngikalè anu mwa . . . Nêngimanyikè.

Tusambilaayi.

¹⁹⁹ Taatù wa mu Dyulu, Nzambi munene wa luse lujaalame! Mukalenge, ndi—ndi . . . pàmwápa ntu ngaakula bipitepite bûngi. Ndi ndomba, Nzambi, piikalabi nanku, bwa Umfwileku luse. Kadi, Mukalenge, ncyéna mwa kulomba luse bwa bîndi mwambe to. Ndi mwambe anu byûdì Wèwè mwambe mu Dìyì Dyebe emu.

²⁰⁰ Mpindyewu dîyì anu dimwepele anyi abidi cyanaana a kûdì Wèwè, Mukalenge, pàmwápa bantu bônsò kaaba aka nebacimone diloolo edi. Cisamba cikese, cya babeedi eci, nebondopiibwe paamonabo ne Wèwè uci anu Mwakwidi wetu Munene. Ndi ndomba, Mukalenge, mu tusunsa tukese tudi tulonda etu, bwa Wèwè kuvwija cyakabidi Mukenji ewu ne mwoyi mu bulelela. Bwa cîngămbîdì ku Dìyì eci, enzaku bwa ngiikadilu Webe aKumanyishishe munkaci mwetu, diloolo edi, bwa ne Wèwè udi umwèumwè awu makeelela, leelu, too ne kashidi, bwalu mu Dîná dya Yesu ki mutudi tulomba nunku emu. Amen.

²⁰¹ Indilaayiku katanci kakese mpindyewu. Tudi, ndi—ndi anu pashiishe ndambu, kadi nudiku mwa kutwala ntanta bule bukumbane bwa mulongo mukese wa babeedi mu tusunsa dikumi ne tutaanu, makumi abidi anyi? Panwikala baswe, elaaayibi byanza muulu, nwamba ne: “Tudi . . .” Eyo, twasakidila—twasakidilaayi. Mwua mulaye bwa kunupatula pa dîbà citeema ne tusunsa makumi asatu. Ki dîbà ditukaadi adi mpindyewu; nkutushaadile tusunsa makumi abidi. Pa nanku bu nwênù mwa kumpaku tusunsa dikumi cyanaana, nêndwîjakajè.

²⁰² Twănjì tumonaayibi tûng, ntwarta twa disambila kaayi tudibo baabanye leelu ewu? [Mwaneetu kampanda udi wamba ne: “O.”—Muf.] O? Cinyi, tuvwa babangile penyi diloolo dikwabo adi, umwe, umwe anyi? [“Ngeela meeji ne civwa ng’umwe.”] Eyo, uh-huh.

²⁰³ Ne pashiishe twêtù, makeelela diloolo awu, tuvwa anu . . . Nyuma Mwîmpè . . . Mwua nteeleja leelu ewu, ne ngambulula civwa cyambiibwe. Amwe a ku mênà a mu Français awu, mvwa . . . Nyuma Mwîmpè; mushindu umwepele wûmvwà mwa kucyenza, anu kwindila bwa kumona.

²⁰⁴ Nwamonu's, misangu mikwabo paudi umona cikeena-kumona, bikengela cikudimunyiibwe ne cyandamunyiibwe. Cidi cyumvwijiibwa. Cikeena-kumona, twãmbè ne udi mufwanyine—udi mufwanyine kumona mukooko, ncifwanyine kuumvwija myôsà ya mukooko. Nwamonu's, bikengela kabidi wèwè kupeta dikudimuna dyaci, nwamonu's, ne kukudimuna cikeena-kumona aci emu ne emu kadi kucyandamuna.

²⁰⁵ Nenku mêmè kumona makeelela diloolo awu ne, ncivwa—ncivwa mwa kushindumuna mènà a mu Français awu to, bivwa bikengela mêmè kubyamba ku dileeta ku dileeta.

²⁰⁶ Mu Afrike ne mu ba-Hottentots ne bampangaanu mwamwa, ne bakwabo, Civwa cifwanyine kwamba dîna ku dileeta ku dileeta, kwamba ne mbaakampanda, kwamba mènà awu ku dileeta ku dileeta mu mwakulu wabo. Bôbò, bôbò bavwa mwa kumanya ne ncinyi ciine aci, pauvwa anu ubyamba ku dileeta ku dileeta apu. Kadi, nwamonu's, kadi Yèyè mmumanye myakulu yôsò. Yèyè udi Nzambi wa Cyendeleele.

²⁰⁷ Tubangilaayi diloolo edi ku, twãmbè ne, makumi mwandamutekete ne itaanu, too ne ku lukama, mu O. O, ki cyãmbiye aci anyi? Ndi. . . [Mwaneetu kampana udi wamba ne: “Eyo, O.”—Muf.] O, O. Eyowa. Eyo. Udi ne karta kaa disambila kaa makumi mwandamutekete ne itaanu nganyi, tükàmònèbi? Mu O, karta kaa disambila O, makumi mwandamutekete ne itaanu, ela cyanza cyebe muulu, yôsò udi naaku awu. Twa O atu. Eyo. Vwilaayi buludi *apa*. Makumi mwandamutekete ne itaanu, makumi mwandamukulu, makumi mwandamukulu ne itaanu, makumi citeema, makumi citeema ne itaanu, lukama, vwilaayi *eku* bu nwênù mwa kuswa. Eyo, bidi, elaayi mulongo anu lwà mwaba *ewu*, lukasalukasa, bwalu katwakwikala ne dîbà to. Nèngiikalè anu mutwishiibwe ne nenücyènzè.

²⁰⁸ Tangila pa karta keebe kaa disambila apu. Tangila pa karta kaa disambila kaa mwena mutumba neebe apu. Cidi. . . Nenku piikala muntu mulema, ulwe anu buludi mu mulongo wa babeedi. Pa nanku piikalaye ne O, anu bu mudi O, makumi mwandamutekete ne. . .

²⁰⁹ Makumi mwandamutekete ne itaanu too ne ku lukama, elaayi anu mulongo mwaba *ewu*, bu nwênù mwa kuswa. Nansha wèwè mwikale penyi, mu bisasa, nansha penyi pakwabo, tuuluka anu patupu, ne ulwe ku mulongo ne lukasa lwôsò, bu wèwè mwa kuswa, mushindu awu bwa kulaminyina dîbà.

²¹⁰ Mpindyewu bakwabo beenu mwaba *ewu*, bàdì kabayi ne karta kaa disambila abu, nudiku mwa kwela byanza muulu nwãmbè ne: “Mêmè ncyèna ne karta kaa disambila to, Mwaneetu Branham, kadi ndi ngiitabuuja” anyi? Elaayi byanza muulu.

²¹¹ Mpindyewu vulukaayi ne, nènnwãmbilè bwalu bwa Mwakwidi Munene. “Yèyè udi Mwakwidi Munene udi mwa kulengiibwa kudi dyumvwa dya mateketa etu.” Yèyè udi

Yehowah-Yilè, “mulambu mulongolola wa Mukalenge.” Yêyè udi *Yehowah-Laafà*, “Mukalenge udi wondopa màsaamà ebe ònsò.” Nudi nwitabuuja nanku anyi? [Disangisha didi dyamba ne: “Amen.”—Muf.] Yêyè udi *Yehowah-Maanàsè*. *Cibwikilu cya pa cyâdi, ngabu, ditalala* dyetu, ki cicidiYe. Ee, mbanganyi badi biitabuuja ne mènà ònsò a bupikudi a Yehowah awu akambiibwa bwa Yesu? [“Amen.”] Bushuwa, ki civwaYe ne cya kwikala. PiikalaYe—piikalaYe. . .Mona’s, kaena atapuludiibwa to, pa nanku Yêyè ki uvwa ne cya kwikala ònsò awu. Nenuk piikalabi ne Yêyè ucidi anu Yehowah-Yilè, Yêyè udi Yehowah-Laafà. Piikalabi ne Yêyè udi Yehowah-Yilè. . .Yêyè udi *Yehowah-Yilè*, Ûdi “mulambu mulongolola wa Mukalenge bwa lupandu,” pa dîbà adi Yêyè udi *Yehowah-Laafà* udi “wondopa màsaamà etu ònsò.” Amen. Dyondopa didi mwa kufumina anu kudi Nzambi.

²¹² Eyo, pacidi bantu beela mulongo apa; ncyèna ne dîbà dya kumona ne mbanganyi anyi badi cinyi to. Kadi mpindyewu, nwênù bônso bàdi aku bàdi bamanye ne ncyèna munumanye abu, ela cyanza muulu, wămbè ne: “Ndi dijinga ne Nzambi. Kadi wêwè kwèna mummanye to, Mwaneetu Branham, kadi mêmè ndi dijinga ne Nzambi. Nèngèlè anu cyanza muulu.”

²¹³ Mpindyewu bu nwênù mwa kwanji kushaala basòmbèle panshi ndambu wa tusunsa, ikalaayi badimuke, shaalaayi bapuwe. Mpindyewu ncyèna muswe kwamba, pândi ngamba bwa “kushaala bapuwe” apu ne. . .Bu Mukalenge mwa kwenza cintu kampanda, neujinge bwa kutumbisha Mukalenge; ki dikuukwila ndyôdi adi. Kadi cîndi mêmè muswe kwamba, “kutambakana eku ne eku, kujuukajuuka kuulu,” nudi bamanye ne, aci ndipanga dya kaneemu. Nwamonu anyi? Ne Nyuma Mwîmpè pende utu mwânaadyòngò wa dikema, mwânaadyòngò wa dikema. Nwamonu anyi? Anu kantu bu kòkò aku, umba unshiya’s, nenku bikengela mêmè kulwangana pa dîbà adi, cyakabidi, nwamonu’s. Kadi bu nwênù mwa kuteelejaku!

²¹⁴ Nudi bavuluke mulayi Wende wa kumpala awu anyi? “Wêwè mufikishe bantu ku dikwitabuuja, ne mwikale ne meeji matooke, cintu nansha cimwe kacyakukandameenaku disambila nansha.” Nudi bavuluke aci anyi? [Disangisha didi dyamba ne: “Amen.”—Muf.] Ncya bushuwa. Ne aci cidi. . .Ncitu mwanji kucimonaku cipangile to, ne kacyyadyakupangilaku to. Cidi n’Nzambi.

²¹⁵ Mpindyewu netulwijakaje ne mulongo wa babeedi, nenku tudi tubabweja bûngi butudi tupetela mushindu abu, bwa bûngi bwa bantu. Kadi nwênù badi ne twarta twa disambila kadi kanuyi babiikidiibwe diloolo edi abu, ikala mukwate karta keebe, netukupete. Eyo.

²¹⁶ Mpindyewu nwênù badi aku kanuyi ne twarta twa disambila abu, nwavulukaayi. Anyi, nwênù badi aku abu, nansha nwênù ne twarta twa disambila anyi kanuyi naatu to, itabuujaayi

anu cyanaana ne Yêyè udi mudi Ebelu nshapita mwi4 ewu. “Yêyè udi Mwakwidi Munene udi mwa kulengiibwa kudi dyumvwa dya mateketa etu.” Numonaayi Yêyè ní udi ushaala . . . Numonaayi Yehowah ní mmuDileeje munkaci mwa bantu Bende, mwakenzaYe mu matuku a Sodoma. Eyo.

217 Eyo, mukalenge. Mpindyewu tusambilaayi, mpindyewu, ikalaayi mu kaneemu kaa menemene. Mpindyewu vulukaayi ne, díyì dimwepele dya kudi Nzambi ndipite cyònsò cidi ní nganyi ní nganyi yònsò mufwanyine kwamba aci. Mpindyewu, muntu mulume ewu, ncyè—ncyèna mumumanye to. Nenu ndi ngeela meeji ne yêyè udi. . . Wêwè ewu udi mwenyi kúndì, kî mmwômò anyi, mukalenge? [Mwaneetu awu udi wamba ne: “Eyo.”—Muf.] Udi mwenyi. Tudi bamanye cintu cimwepele ne, twètù bònsò babidi netwikale ne cya kwimana mu Bwikadi bwa Nzambi dîngà dituku; twètù bu bantu, netwikale ne cya kutwilangana Kwòkò aku. Ewu musangu ngwetu wa kumpala wa kutwilangana.

218 Mpindyewu piikalabi ne udi mulwe mwaba ewu, piikalabi ne udi usaama, mèmè ncyèna mumanye to; ncifwanyine kwikala cintu cya cyanaana, wamonu’s. Kadi bu mèmè—bu mèmè mwa kukutentekela byanza, kwamba ne: “Mukalenge atumbe! Ndaaku, wondopiibwe.” Aci’s ncimpè. Wêwè udi mufwanyine kwitabuuja cyòcì aci. Kadi amba tũng bu Yêyè mwa kukwambila lutatu lûdi naalu? Mpindyewu, wamonu’s, aci’s ncishiilangane, pa dîbà adi udi umanya ne aci ncidi cimanyisha ngiikadilu Wende. Nwamonu’s, aci kî ncifwanyine kwikala ngiikadilu wanyi mèmè to. Mèmè ndi muntu; ncyèna mufwanyine kumanya kantu nansha kamwe kadi kamutangila to. Ngáfumu ku dimwambila ne: “Ncyèna mukumanye to.” Yêyè kî mmumanye to. Kadi cidi aci cifwanyine kwenza ncinyi? Aci ncifwanyine kumanyisha ngiikadilu wa Yesu Kilisto umwèumwè awu makeelela, leelu, too ne kashidi. Bu mudibi ne kî ncifwanyine kwikala mèmè to, kî ncifwanyine kwikala mèmè to, bwalu mèmè ncyèna mumanye muntu ewu to. Nyewu ngeela cyanza cyanyi muulu; Díyì ndyòdì *edi*. Nwamonu anyi? Ncyèna mumumanye to. Yêyè kî mmumanye to. Kadi ngiikadilu wa Yesu Kilisto . . .

219 Bu ne Yesu nguwwa mwimane kaaba aka, ne yêyè ewu, mwikale usaama, bu yêyè mwa kwamba ne: “Mukalenge Yesu, ngondòpèku,” Yesu uvwa mufwanyine kumwambila cinyi? “Nkaadi mumane kucyenza.” Ncya bushuwa anyi? [Disangisha didi dyamba ne: “Amen.”—Muf.]

220 “Yêyè wakatapiibwa mputa bwa dishipa dyetu dya mikenji; ku mibundabunda Yende twâkondopiibwa.” Bupikudi bwònsò butudiku mwa kupeta abu bukaavwa bumane kwenjiibwa ku Kalvariyo. Kubangila anu piine apu, cikaadi ndiitabuuja, kwitabuuja mudimu mumana kujikija. Ncya bushuwa anyi? [Disangisha didi dyamba ne: “Amen.”—Muf.] Eyo.

221 Mpindyewu, mpindyewu piikalabi ne Yesu udi ne mwoyi, ne mêmè mwakule pa Dìyì Dyende. . . Ki nwènù abu, baalukile ku bupwekele abu ne diitabuuja, kwitabuuja kwa Dìyì Dyende. PaakatwilanganaYe naanyi diloolo adi, Wakamba ne: “Nebyenzeke ne wêwè newikale umanya mene nansha maalu masokome a mu myoyi yabo. Bôbò kabayi biitabuuje cimanyinu cya kumpala cya mu cyanza aci to, nebiikale ne cya kwitabuuja eci nunku.” Nwamonu anyi? “Bôbò kabayi benze nanku to, pa dîbà adi mashi adi ela buloba mulawu.”

222 Anu mwakenzekabi mu cikondo cya Môsà. Wakamba ne: “Bôbò kabayi biitabuuje bimanyinu bibidi abi to, pa dîbà adi upongolole mashi panshi,” nwamonu’s, “upongolole mâyì panshi, neandamuke mashi.”

223 Mpindyewu anu bwa kujandula cyanaana, bu mêmè anu mwa kumona ne lutatu lwebe ludi cinyi, aci ncifwanyineku kukusankisha ne kukufikisha ku diitabuuja, kî mmwômò anyi? [Mwaneetu awu udi wamba ne: “Cya bushuwa.”—Muf.] Wêwè’s udi mumanye ne bivwa bikengela kwikalaci ngiikadilu wa Mupersona úndi ngamba ewu, Yesu Kilisto.

224 Muntu ewu, anu pângáfumu ku dimutangila apa, udi udisaka paanyima. Mmubwikila kudi mundidimbi. Kakwenaku cintu cidi baaminganga bafwanyine kukwacisha naaci muntu ewu to. Yêyè udi mu ngiikadilu wa ùpunga ne lufu. Ncya bushuwa. Mbamupande, ne dimupanda adi ndya mpaci wa mênýi. Ne cyôci ciine nkansere, ne kansere aku nkatangalake mu mubidi webe wónsò. Piikala aci ne ncya bushuwa, ela cyanza cyebe muulu. Anu Nzambi ngudi mwa kumwondopa. [Mwaneetu awu udi wamba ne: “Aleluuyah! Aleluuyah! Aleluuyah!”—Muf.] Kadi, monaaku, ndi njinga nkwabileku cintu kampanda, mukalenge. Démon awu mmufwanyine kwikala musokome kumpala kwa keele kaa ngangabuka, kadi kêna mwa kusokomaku kumpala kwa Nzambi to. Udi witabuuja nanku anyi? Udi uciitabuuja anyi? [“Kaa! Kaa!”] Pa dîbà adi ndi nsambila, ne, mu Dîná dya Yesu Kilisto, cintu aci cishiye mwaba, muntu ewu ikale ne mwoyi. Cintu nansha cimwe; yêyè wapeci anu butekete cyanaana. Eyo.

225 Wêwè ne mêmè katwena bamanyangane to, muntu mulume ne muntu mukaji mbatuutakeene. Mpindyewu, mêmè bu muntu mulume, ncyèna mukumanye to. Ne pâmwâpa, wêwè bu muntu mukaji, kwèna mummanye to; anu mudibi mwa kwikala ne ukaadi anu mumone dîná dyanyi, anyi fôtò wanyi, anyi cintu bu nanku awu amu. Kadi katwena bamanyangane to. Ayi ki yetu ngiikadilu. Katwena bamanyangane ngiikadilu to. Kadi ngiikadilu wa Kilisto, Yêyè udi Dìyì, ne Dìyì ndidi dilayibwe bwa dituku edi. Wêwè wângumvù ncyamba. Nenku ngiikadilu Yende nyidi mifwanyine kuMumanyishisha kaaba aka. Kî mmêmè mMumanyishisha Yêyè to. Mêmè ncyèna mukumanye to. Udi muumvwe. Disangisha dyetu ndyumvwe ciine aci anyi?

[Disangisha didi dyamba ne: “Amen.”—Muf.] Wamonu anyi? Mêmè ndi—mêmè ndi muntu. Ndi mêmè anu mwaneenu wa balume cyanaana.

²²⁶ Bu mukaji wa ku ciina cya mâyi awu, ngamba cintu kampanda cidi citacisha, cintu kampanda cidi cikutàcishà aci, anyi cyûdi ujinga, anyi cyûdi muvwile kaaba aka aci. Nzambi ikale nzuji wa cyôci aci. Udi usaama disaamà dya mashi ajika. Aci ncyà bushuwa, kî mmwômò anyi? [Mwaneetu wa bakaji awu udi wamba ne: “Eyo.”—Muf.]

²²⁷ Ntu—ntu ntuutakeena ne cya nanku ku musangu ne ku musangu, muntu wela meeji ne ndi mubûke cyôci aci. Ncitu ncibûka to. To. Ku musangu ne ku musangu, ntu ngumvwa aci, muntu kampanda. Kwèna mwa kusokoka meeji ebe mpindyewu to. Mpindyewu, ndi mumanye ne, kudi beena mpatà baa babi menemene batwe ku babidi basòmbe kaaba aka. Nwamonu anyi? Pa nanku mpindyewu vuluka ne ndi mwa kukuteela ne mu dînà, wèwè, Nzambi udi mwa kucyenza, pa nanku lekela kwela meeji awu. Lekela nkuleeje nanku awu.

²²⁸ Tangila kuneeku, inàbànzà. Ntàngilèbi mêmè. Mêmè ncyèna mumanye cidiYe mukwambile to, kadi ndi—ndi mumanye cidiYe. Nenku ki ngiikadilu Wende udi mumanyishiibwe nyèyè awu. Eyowa, ndisaamà dya mashi ajika, mashi, mâyi.

²²⁹ Mpindyewu, kaaba aka, cintu kampanda ncyôci eci. Monaayaaku ní badi beela meeji ne eci ndibûka. Wèwè udi ne mwànà ùdi usambidila, udi kaaba aka. [Mwaneetu wa bakaji awu udi wamba ne: “Eyo.”—Muf.] Ncyà bushuwa. Ûdi naadi, pa muminu, [“Eyo.”], bya pa muminu, tuubutàma. Dikaadi dindile dipandiibwa. Kî mmwômò anyi? [“Eyo.”] Angata mushwala awu umutentekele, ne witabuuje. [“Eyo.”] Kwedi mpatà to. Kacyakukengela dipanda to. Mpindyewu itabuuja ne mwoyi webe wònsò.

²³⁰ Wetwawu! Bwalu budi ne, bwa mukaji ewu, wèwè udi ne bwôwà bwa cintu kampanda. Udi ne bwôwà bwa ne nkwèpi kwikala dikeji dya cileleledi dikaadi dyandamuke kansere. Uh-huh, uh-huh. Mpindyewu ndaaku, mwikale witabuuja, nenku kabyakwikala mushindu awu to. Ndaaku anu cyanaana, mwikale witabuuja ne mwoyi webe wònsò. Ngiikadilu, kayiyi yanyi mêmè to; Yende Yèyè!

²³¹ Nudi nwitabuuja mpindyewu anyi? [Disangisha didi dyamba ne: “Amen.”—Muf.] Aci’s bivwa bikengela kufikishaci muntu ne muntu ku diitabuuja. [“Amen!”]

²³² Mpindyewu, ncyèna mukumanye to. Ndi mwenyi kûdi. Nzambi ngudi mukumanye. Udi witabuuja ne . . . ? Udi mumanye ne mêmè ncyèna mukumanye to, ne udi mumanye ne wèwè kwèna mumanye to, pa nanku udi witabuuja ne Nyuma udi wakula ewu kèna mwa kwikala nyuma wanyi mêmè anyi? Bwalu, mêmè, bu muntu, ncyèna mukumanye to. Kadi ngiikadilu wa

Dìyì dilaya n'Dìyì didi ditwe kupita mwele wa mvita wa nseke ibidi, ne dìjingulula meeji ne mapangadika a mu mwoyi.

²³³ Wêwè udi usaama bikole be. Uvwa ne dîsaamà dya bânà bakaji, divwa mmatrice, ne matrice awu avwa ne kansere. Nenku uvwa muye kalonda dyondopiibwa dya mushindu kampanda, divwa ndyondopiibwa dya ku cyamu cya mîdimà, ne cintu cimwepele cididi dyenze civwa nkukatangalaja mu mubidi webe mujima. Nenku neu—neufwe piikala Nzambi kayi mukwondope. Aci ncyà bushuwa. Udi mpindyewu witabuuja ne Yèyè neakwondope anyi? [Mwaneetu wa bakaji awu udi wamba ne: “Eyo.”—Muf.] Nzambi wa mu Dyulu asweku atandishe démon udi musokome ngangabuka awu. [“Kaa!”] Mmufwanyine kwikala musokome cyamu cya mîdimà, kadi kî n’Nyuma Mwîmpè nansha. Ndaaku, uMwitabuuje, mpindyewu, mwaneetu wa bakaji. Kwediku mpata to nansha kakese, kadi itabuuja.

²³⁴ Udi witabuuja ne Nzambi udi mwa kwondopa dîsaamà dya mfwenke adi, ne kukusangaja anyi? [Mwaneetu wa balume awu udi wamba ne: “Eyo.”—Muf.] Udi uciitabuuja anyi? Nanku kwata njila ndaaku, wenda usanka, wamba ne: “Twasakidila, Mukalenge. Ndi ngiitabuuja ne dîsaamà dyanyi dya mfwenke adi dyajiki.”

²³⁵ Wetwawu! Wêwè udi ne mutu ukunyunguluka. Udi ne mutu ukunyunguluka kukaadi ntanta mule. Mwômò amu, cikaadi cijuule cyûjà cya mu cifu cyenze mu cifu mwebe amu, ki cidi cikujuula—dîsaamà dyebe dya cifu adi. Nenku udi muswe. . . Udi muswe kudya cyakudya cyebe cya diloolo anyi? Newènzè cîndî nkwambila bwa kwenza anyi? Ndaaku, udye, mu Dînà dya Mukalenge Yesu.

²³⁶ Udi witabuuja ne mwoyi webe wònsò anyi? [Mwaneetu wa bakaji awu udi wamba ne: “Ndi ngiitabuuja.”—Muf.] Wêwè udi inábànzà wa maalu malenga be, mudibi bimweka. Udi witabuuja ne mêmè ndi musadidi Wende anyi? [“Amen.”] Udi witabuuja ne ngiikadilu Wende mmufwanyine kwikala kaaba aka, bwa. . . Dìyì, Dyôdî diine, ne mulayi wa dituku edi ne: “Byenzi bindi Mêmè ngenza nenûbyènzè peenu” anyi? [“Amen.”] Mêmè ncyèna mwa kwondopa to. Yèyè ngukaadi mumane kucyenza; kadi ngiikadilu Wende ngudi uMuleeja patooke, udi mwa kwamba lutatu lûdi naalu. Udi ne dîsaamà dya bantw bakaji, dîsaamà dya bânà bakaji. [“Eyowa’s, mukalenge.”] Udi witabuuja ne Nzambi udi udyondopa mpindyewu anyi? [“Eyowa. Amen.”] Kwata njila ndaaku, kadyakukutacisha kabidi to. Itabuuja ne mwoyi webe wònsò.

²³⁷ Udi witabuuja ne mêmè ndi musadidi Wende anyi? [Mwaneetu wa bakaji awu udi wamba ne: “Eyowa’s, mukalenge.”—Muf.] Bu Nzambi mwa kungambila cidi lutatu lwebe, newitabuuje ne nngiikadilu wa Yesu Kilisto awu anyi? Cidi mu nyima webe amu. Kacicyenamû kabidi to. Ndaaku, witabuuje ne mwoyi webe wònsò. Witabuuje.

238 Lwâkwaku, inâbânzà. Ne wêwè peebe udi ne disaamà dya cifu. Itabuuja ne mwoyi webe wônsò, nenku uye kadya didya dyebe dya diloolo. Ucipwe mwoyi. Yesu Kilisto udi ukwondopa.

239 Lwâkwaku. Lutatu lwebe mmashi ebe. Udi ne disaamà dya nsukaadi. Udi witabuuja ne Nzambi neakusangaje ne neondope cyôci aci anyi? Kwata njila ndaaku, wamba ne: “Twasakidila, Mukalenge Yesu,” ukusangaja. Ndaaku, witabuuje ne mwoyi webe wônsò.

240 Lwâkwaku. Nyima webe awu, Udi witabuuja ne Nzambi neondope nyima awu ne neakusangaje anyi? Kwata njila ndaaku, wenda usanka, wamba ne: “Twasakidila, Mukalenge Yesu.”

241 Ne wêwè peebe uvwa ne cintu kampana cikutacisha mu nyima webe amu. Tungunuka anu ne kwenda kuya, wamba ne: “Twasakidila, Mukalenge. Ndi mwondopiibwe.” Wêwè ùcítàbùùjè ne mwoyi webe wônsò.

242 Ne wêwè peebe uvwa ne disaamà dya nyima. Cyûdi mumanye ncinyi pa bwalu abu? Itabuuja ne mwoyi webe wônsò mpindyewu, ne kwata njila ndaaku ne neusangale. Itabuuja ne Yesu Kilisto udi ukusangaja. “Bu wêwè mwa kwitabuuja, byônsò bidi mwa kwenzeka.” Eyo.

243 Kadi bu mêmè nciyi munwâmbile bwalu, mupite cyanaana kadi kumutentekela anu byanza, nudi nwitabuuja ne yêyè mmufwanyine kusangala anyi? Mbamone cidi citacisha aci. Nudi nwitabuuja ne yêyè mmufwanyine kusangala anyi? Lwâku apa. Ndi nkina démon ewu, mu Dîna dya Yesu Kilisto. Bukole bwa Nzambi bwondopeku mwânà ewu. Amen. Kwedi mpatà to, kwediku mpatà to nansha kakese, nenku yêyè neasangale. Itabuuja ne mwoyi webe wônsò.

244 Nzambi kayi mukwondope to, newendela ku dibaya dya balema dîngà dituku, bwa binyoka abi. Kadi udi witabuuja ne Nzambi udi wondopa binyoka byebe abi anyi? Nanku ndaaku, wamba ne: “Twasakidila, Mukalenge. Ndi nKwitabuuja, ne Wêwè ki udi unsangaja.” Eyo.

245 Lwâku mpindyewu. Mbwa bukole bûkaadi cya bushuwa. Udi ne mutu ukunyunguluka bikole. Utu umvwa mutu ukunyunguluka bikole, pakaadi dîbà dilooloka bikole. Paudi ukwata mudimu ne bikwabo byônsò, udi umvwa mutu ukunyunguluka bikole. Udi witabuuja mpindyewu anyi? Nanku kacyakukutacisha kabidi to. Kwata njila ndaaku, wenda wamba ne: “Twasakidila, Mukalenge Yesu.”

246 Lwâku, mukalenge. Udi witabuuja ne Nzambi udi wondopa disaamà dya mwoyi anyi? [Mwaneetu awu udi wamba ne: “Eyo.”—Muf.] Yêyè neondope disaamà dyebe dya mwoyi adi anyi? Tungunuka wêwè anu ne kuya, wamba ne: “Twasakidila, Mukalenge. Ndi ngiitabuuja ne mwoyi wanyi wônsò.”

247 Nzambi utu kabidi wondopa disaamà dya cyàdi, dyôdi adi. Udi witabuuja aci anyi, mukalenge, ne mwoyi webe wónsò? [Mwaneetu awu udi wamba ne: “Ndi nciitabuuja.”—Muf.] Eyo. Kwata njila ndaaku, wenda usanka, wamba ne: “Twasakidila, Mukalenge Yesu.”

248 Kadi nwênù bàdì aku abu, nudi nwitabuuja anyi? Kadi bishi bwa bateeleji? Bamwe baa kunudi mu bateeleji nudi nwitabuuja mpindyewu.

249 Muntu udi musòmbe apa, udi ne lukoso lwa ntukunku elu, udi witabuuja ne Nzambi neondope disaama dya disansakana dya pa muminu adi anyi? Eyo, udi mwa kupeta cyûdi mulombe aci, pa dîbà adi. Amen.

250 Lwendu lwa mashi aya lubilu, wêwè udi musòmbe paanyima pende wawa. Udi witabuuja ne Nzambi neondope lwendu lwebe lwa mashi aya lubilu alu anyi? Lwajiki, mukalenge. Ncyèna mumumanye to, nciitu mwanji kumumonaku to kacya bandela.

251 Amba tŭng, mukalenge, udi witabuuja ne didikoka dya misunya didi mu mapùndà ebe adi, didikoka dya misunya dya mapùndà adi azakalala adi, udi witabuuja ne Nzambi neàdyòndòpè anyi? Udi witabuuja anyi? Elabi cyanza cyebe muulu pawikala witabuuja. Eyo.

252 Mukajeebe udi musòmbe pààpa wawa, ùdi ùtàcishiibwa ne disaama dya mutu wa kapàla. Udi witabuuja ne didi dikushiila mwaba anyi, wêwè peebe, mwaneetu wa bakaji?

253 Inábànzà udi musòmbe anu lwa paanyima peetu pààpa, ùdi ne mijilu myûle. Udi witabuuja ne Nzambi neondope mijilu yebe myûle ayi anyi, inábànzà?

254 Ke inábànzà nyêyè ewu muvwale kankooci, muvwale kankooci kakunze, mwaba ewu. Mmusòmbe mwaba awu. Ùdi ne disaama dya mutu wa kapàla, yêyè pende. Udi witabuuja ne Nzambi neondope disaama dya mutu wa kapàla adi anyi? Elabi cyanza cyebe muulu, pawikala uciitabuuja.

255 Muntu yònsò munda emu udi witabuuja ne ngiikadilu wa Yesu Kilisto udi munkaci mwetu, diloolo edi, èlè cyanza muulu, àmbè ne: “Ndi nciitabuuja.” [Disangisha didi disanka dyamba ne: “Ndi nciitabuuja!”—Muf.]

256 Bònsò bàdì munda emu aba, bàdì baswe kuMwitaba bu mwondopi wenu abu, juukilaayi kuulu, nwàmbè ne: “Ndi nciitabuuja.” Juukilaayi kuulu. Juukaayi, mu nkwasu yenu ayi, nansha ciikale cinyi. Yesu Kilisto umweumwe awu makeelela, leelu, too ne kashidi. Nyawu nnupeeshaYe, mu Dîná dya Mukalenge Nzambi.



NZAMBI ÛDIMANYISHILA KU NGIKADILÙ YÈNDÈ LUA64-0320
(God Identifying Himself By His Characteristics)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diitânù diloolo, mu matuku 20 a ngondo mwisâtù, cidimu cya 1964, mu Tulaasa Tubandile twa Denham Springs mu Denham Springs, Louisiane, U.S.A. Ndyumusha pa mukaba wa mêyi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org